



UPNG pasim skul bilong yia 2016



VAIS Sansela i tokaut long Tunde olsem Yunivesiti bilong Papua Niugini long Pot Mosbi bai pasim skul long dispela yia. Planti ol sumatin bilong ol narapela provins bai lusim skul ples long dispela wiken. Olsem tupela sumatin meri bilong Is Sepik, Natasha Makis namba tri yia long Bisnis Menesmen na Loraine Baure namba wan yia Bisnis Fainens i karim kago bilong tupela na lusim skul ples. Tupela bai go long Wewak tude Fonde. *Poto Nicky Bernard*

TUPELA Waigani Kempas na Taurama Kempas bilong Yunivesiti ov PNG (UPNG) bai pas na i no gat skul long dispela yia, Sensela Dokta Nicholas Mann i tok.

Dokta Mann i tokim ol sumatin, papamama na ol leksera long Tunde dispela wik olsem Yunivesiti Kaunsil i bihainim ol toktok bilong Akedemik Senet long kenselim akedemik yia 2016 bikos ples i no stap gut long larim ol sumatin na leksera i stap gut na skul.

Dokta Mann i tok long larim ol sumatin i stap gut na kisim gutpela tingting long skul, ol i no ken pret long arapela samting na sefti bilong leksera na sumatin wantaim il mas stap gut.

"Tasol sampela ol sumatin, husat i strong yet long larim Praim Minista Peter O'Neill i lusim sia, i wok long pretim ol, bagarapim ol samting bilong yunivesiti, na kamapim bikipela birua long kempas," Dokta Mann i tok.

Dispela pasin i kamapim bikipela asua bilong lo na oda, na i larim Yunivesiti Kaunsil i mekim disisen long pasim skul.

Dokta Mann i tok skul bai stat gen long neks yia bikos nau sefti bilong ol sumatin na leksera i no stap gut bihain long ol sumatin i bin protes, polis i bin sutim ol, na ol sumatin i kukim kar na haus bilong yunivesiti.

Dokta Mann i tok dispela kain pasin bilong ol sampela ol sumatin bai no inap helpim arapela ol sumatin husat i laik go bek gen long skul na statim ol stadi bilong ol bihain

long ol i no bin skul long moa long 9-pela wik bilong semesta wan.

"Dispela i kamapim wanpela bikipela hevi bilong lo na oda. Tingting bilong ol sumatin na leksera i no stap gut. Ol i pret taim arapela sumatin i wok long rausim ol long leksera rum, paitim ol arapela sumatin husat i laik go skul, na karim ol bus naip na ol samting bilong kamapim birua long laip," Dokta Mann i tok.

Em i tok arapela ol samting olsem risets, pos greduet supavisen, komyuniti autrits, na administresen wok bai kamap, tasol pasin bilong skul we leksera i save lainim ol sumatin, bai no inap kamap long dispela yia.

Em i tok kefu o taim tambu we gavman askim polis i putim long was long Waigani Kempas bai stap yet. Gavman yet bai mekim disisen long rausim ol polisman long sekuriti wok long kempas, Dokta Mann i tok.

Yunivesiti Kaunsil i tokim olgeta sumatin long lusim kempas long dispela wik Sarere.

Long Trinde long dispela wik, Wantok Niuspepa i bin go lukluk raun long Waigani Kempas.

Wan wan sumatin husat i bin lusim kago long skul na stap long kempas i wok long rausim ol samting bilong ol na karim i go ausait.

I no gat planti sumatin i raun long kempas. Ol polisman i putim was long skul na i raun i stap yet.

Wan wan sumatin tasol i raun long Forum eria na buk-sop.

Dispela em i namba tri taim UPNG i kenselim akademik yia. Namba wan taim bilong kenselim akadeik yia i bin kamap long yia 1991, na namba tu taim i bin kamap long yia 2001.

Lukim moa stori long pes 5

Insait:



The Catholic Reporter

P9,10,19,20

PNGSDP mani stap gut: Mekere - P3

Kala bilong meri Asaro i gat kik - P7



The Voice Inc CEO bai jas long TribeFM Teen Awot

NUPELA Eksekutiv Dairekta bilong The Voice inc, Barbra Thomas em i wanpela bilong ol 5-pela jas husat bai makim ol wina bilong TribeFM Teen Ekselens Awot o Awot bilong ol Yangpela we bai kamaut long pinis bilong mun Ogas, 2016.

Barbra Thomas, em i wanpela strongpela yut lida long kantri, i sapotim Ekselens Awot bilong ol Yangpela, long kirapim tingting bilong ol yangpela man na meri long kamap ol gutpela lida.

Barbra Thomas, i gat 28 krismas na em i save givim gutpela tingting long planti yangpela pipel. Long yia i go pinis, em i bin kisim nominesen bilong Westpac Awot bilong ol Meri i mekim ol gutpela wok long komyniti (Westpac Outstanding Women's Award).

Mis Thomas i tok kain rot olsem TribeFM Teen Ekselens Awot, em inap long senisim ol kain nem nogut we ol yangpela i save kisim.

"Mi save olsem i gat planti toktok na tingting nogut i stap antap long ol yangpela bilong tude. Mi ken tingim mi yet olsem wanpela yangpela meri na taim mi save ritim ol stori bilong ol yangpela lain olsem mi yet, husat i save mekim ol gutpela wok long komyniti bilong ol, na ol i no save larim ol tingting olsem ol i yangpela tumas o

wanem kain laip ol i stap long en i stopim ol long mekim ol kain gutpela wok olsem," em i tok.

Ol gutpela stori bilong ol yangpela husat i mekim ol gutpela wok, i kirapim em long mekim ol wok olsem wanpela yangpela meri. Nau em i ting olsem Tribe Teen Ekselens Awot bai wokim wankain tasol long ol yangpela bilong tude.

"Mi gat hop olsem dispela pletfom bai kirapim tingting bilong ol yangpela man na meri long kamap ol strongpela sitisen long wankain wei mi bin save kisim tingting," em i tok.

"Mi amamas long stap olsem wanpela jas long dispela program bikos mi bilip olsem em i gutpela samting long givim luk-save long ol yangpela pipel husat i laik kamapim senis na kamap ol gutpela piksa bilong ol narapela insait long komyniti," Mis Thomas i tok.

TribeFM Teen Ekselens Awot nau i wok long kamap yet long redio bilong ol yut yet. TribeFM stesin na em i wanpela stesen bilong Nesenel Broadcasting Kopresen (NBC).

I gat 7-pela kategori long resis long en; Spot, Edukesen, Disabiliti, Bisnis na Nupela kain Wok, Helt na Welfe, At na Musik na Komyniti.

Ol pipel i mas pulimapim ol dispela pepa hariap bikos nau i



gat tupela wik tasol i stap long deit bilong eplikesen i pas.

Man i go pas long dispela program, William Gorogo i tok, ol i kisim pinis planti yangpela husat i laik long stap insait long dispela resis na tu ol i save long ol narapela lain husat i mas stap insait long ol dispela resis.

"Mipela i laikim ol dispela fom

long kam insait, nogut bai mipela i no inap long putim ol dispela lain i go insait, taim Barbra wantiam ol narapela jas i bung long makim ol wina bilong Tribe Teen Ekselens Awot," Mista Gorogo i tok.

Nominesen bai pas long Julai 22. Ol fom i stap long Nesenel niuspepa long ol Tunde na

Fonde, na long dispela niuspepa, long Fonde na tu long NBC na ol haikul.

Nem bilong ol wina bai kamaut long Ogas 21 long namba wan intensenel Yut De long Pot Mosbi. Gavana Powes Parkop bai sponso long selebren bilong intensenel Yut De wantiam ol narapela lain tu olsem Wol Helt Ogenaisesen.



1: TribeFM i redio stesen bilong ol yangpela wantaim NBC. Ol presenta i painim 7-pela yangpela bilong kisim ol Teen Ekselens Awot long dispela yia.

2: Nupela CEO bilong The Voice Inc. Barbra Thomas.

Long Tem Fan i bilong pipel: O'Neill

OLGETA mani i stap aninit long Long Tem Fan bilong PNG Sustainable Development Program (PNGSDP) em i mani bilong ol manmeri Westen Provins na PNG, Praim Minista Peter O'Neill i tok.

Mista O'Neill i tok gavman bai mekim olgeta samting aninit long lo long putim was na lukautim dispela Long Tem Fan i stap long Singapore.

Mani mak bilong Long Tem Fan em i US\$1.3 (K4 bilien) na em i mani bilong ol manmeri bilong Westen Provins, Mista O'Neill i tok.

"Mipela i statim ol wok long bringim dispela mani i kam bek long PNG na larim sampela mani i go long kirapim ol developmen projek we ol pipel i ken bene-

fit,"Mista O'Neill i tok.

Em i tok sampela wan wan man i bagarapim ol samting tasol gavman i gat strongpela bilip olsem dispela mani bai kam bek gen long PNG na helpim ol manmeri bilong Westen Provins.

"Gavman i winim kot long Singapore na tu i winim intenesenel abitresen kot long Amerika. Dispela i soim gutpela mak olsem wanem samting gavman i mekim long PNGSDP em i gutpela samting long helpim ol manmeri bilong Westen Provins,"Mista O'Neill i tok.

Mista O'Neill i tok em i amamas tu long luksave olsem Sia-man bilong PNGSDP, Sir Mekere Morauta, i wanbel long toktok wantaim gavman long stretim

toktok long bihain bilong PNGSDP.

"Sapos Sir Mekere i no bin les long toktok wantaim gavman, mipela i no inap long pulim taitim go kam.

"Mipela toktok long ol samting. Na i no samting bilong mi o Sir Mekere. Ol samting bilong manmeri bilong Westen Provins,"Mista O'Neill i tok.

Long las wik, Sir Mekere i tok em i redi long toktok wantaim gavman na stretim bihain bilong PNGSDP.

Ol bod ov dairekta bilong PNGSDP i bin bung long Pot Mosbi long las wik we ol i bin holim anual jeneral miting bilong kampani.

Long dispela taim, Sir Mekere i tok olgeta mani bilong ol pipel

bilong Westen Provins i stap aninit long Long Tem Fan bilong PNGSDP na i stap gut tru aninit long was bilong ol dairekta bilong kampani.

"Mani mak bilong Long Tem Fan i wok long gro, na nau veliu bilong em i stap long \$US1.3 bilien. Long PNG Kina, dispela fan ya i bin stap long K3.4 bilien, tasol nau em i gro i go antap long K3.9 bilien," Sir Mekere i tok.

Em i tok PNGSDP i wok long inves long sampela hap long mekim moa mani na apim veliu bilong dispela long tem fan, tasol ol i stopim ol developmen projek ol i save givim long ol komyniti long Westen Provins na PNG taim gavman i tekova long Ok Tedi Maining.



TribeFM Teen Excellence Awards 2016

Nominate your 'Teen Hero'

Do you know an outstanding teenager, who demonstrates leadership and resourcefulness in their community?

The 2016 inaugural TribeFM Teen Excellence Awards will celebrate 7 teenagers from across Papua New Guinea, between the ages of 13 and 19 who have demonstrated personal growth, leadership and a commitment to the community in which they live.

CATEGORIES AND CRITERIA

The nominees must demonstrate the core values of personal growth, leadership and commitment.

HEALTH & WELFARE

For a young person dedicated to improving their own health and that of those in their community by encouraging health-focussed activities in their schools, families and other community groups

MUSIC & ARTS

For a young person who's shown outstanding ability in the arts and music and may have used them to effect change in their community

SPORT

For a young person who's shown significant sporting dedication and achievement and may have used them to contribute to their community

COMMUNITY

For a young person who's passionate about putting other people's needs first, having given up their time and energy for their community

EDUCATION

For a young person who's shown significant achievement or improvement in their schooling, or someone who has a track record of supporting the learning of others

BUSINESS & INNOVATION

For a young person who's innovative and demonstrated a business activity that benefits themselves and their community

DISABILITY

For a young person making a difference by supporting those with a disability, including young people with a disability who are making difference to their own lives and the community

HOW TO NOMINATE

Fill out this form with as much information about your nominee as possible. Incomplete forms will not be accepted.

Entries MUST be received by 5.00pm on Friday 22 July 2016
Please submit your completed form to TRIBE 92FM via one of the following ways:

Mail to: Tribe92FM, NBC, PO Box 1359, Boroko, Port Moresby, PNG
Drop in person to your nearest provincial NBC OFFICE
Via TribeFM's Facebook page (send a photo of the completed form)
Via Whatsapp to 7019 9105 (send a photo of the completed form)

Queries can be directed to 325 3439 between 8.30 – 4.30pm, Monday to Friday or email wgorogo@nbc.gov.pg

NOMINATE YOUR 'TEEN HERO' FOR THE INAUGURAL TRIBE92FM TEEN EXCELLENCE AWARDS

Please TICK ONE of the following categories to nominate your TEEN HERO:

★ HEALTH AND WELFARE

★ EDUCATION

★ DISABILITY

★ SPORT

★ COMMUNITY

★ BUSINESS AND INNOVATION

★ MUSIC AND ARTS

NOMINEE'S DETAILS (Teen Hero):

Full name: _____
Address: _____
Date of Birth: _____
Contact phone number: _____

NOMINATOR'S DETAILS:

Full name: _____
Relationship to your Teen Hero Nominee (ie father, teacher, Church leader): _____
Address: _____
Contact phone number: _____

On a separate page, explain in detail why your Teen Hero deserves to be recognised in this year's TTEA Awards. Attach it firmly to this nomination form.
You MUST include specific examples of how they have demonstrated personal growth, leadership and commitment in the category you are nominating them for

Rules/Conditions of Entry:

- Open to PNG residents
- Nominees must be aged between 13-19
- Groups/teams may be nominated
- All nominations must be accurate and original
- Final judging will be done by a panel appointed by TribeFM
- If judges find there are no suitable nominations for a category, no award will be allocated
- Finalists will be notified by phone
- Winners will receive awards/financial sponsorship which are expected to be reinvested within the category they've been awarded
- Winners' names/photos and other details will be published in the media

Proudly supported by:




Baki no wanbel long Awesa

POLIS Komisina Gari Baki i no wanbel long wanpela toktok Minsta bilong Woks, Francis Awesa, i bin mekim long las wik long taim bilong haus kraibilong Graham Romanong.

Long taim bilong haus kraibilong Mista Romanong long Momei Oval long Mendi, Mista Awesa i toktok strong long gavman i mas rausim Vais Sensela bilong PNG Yuni-versiti ov Teknologi (Unitech), Dokta Albert Schram, na Lae Met Sup Anthony Wagambie Jr bikos tupela man i no mekim gut wok bilong tupela.

Sampela man i bin kilim fes yia Lens na Sevei sumatin, Mista Romanong bilong Mendi, Sauten Hailans, long rum bilong em long Unitech long tupela wik i go pinis.

Mista Awesa, husat i Memba bilong Imbonggu, i no bin wanbel long ol man i bin kilim dispela Imbonggu sumatin, na em i sutim tok

strong long gavman i mas rausim Dokta Schram na Met Sup Wagambie Jr.

Tasol Polis Komisina Baki i tok Mista Awesa i mas save olsem polisman long Lae o Unitech edministresen i no bin kamapim dispela asua long Taraka kempas we Mista Romanong i dai na tripela haus i paia.

"Mi amamas long Mista Wagambie i mekim gutpela wok long daunim dispela hevi. Ol politisen i no ken sutim tok tok nating," Mista Baki i tok.

Mista Wagambie Jr i tok em i mekim polis wok na polis komisina wantaim tripela divisinel komanda em ol man we em i bihainim toktok bilong ol.

"Mi no pret long toktok bilong Minista Awesa. Dispela hevi long Unitech em i hevi bilong politiks, na ol politisen olsem Mista Awesa i no ken opim maus nating na toktok.

PNGSDP mani stap gut: Sir Mekere

LONG Tem Fan bilong ol manmeri long Westen Provins i stap aninit long PNG Sastenebel Development Program (PNGSDP) i stap gut long Singapore, Siaman Sir Mekere Morauta i tok.

Sir Mekere i tok PNGSDP i hat long mekim ol developmen projek long ol rural komyuniti long Westen Provins bikos gavman i tekova long Ok Tedi Main-ing Limited (OTML).

PNGSDP i save kisim mani long OTML na yusim dispela mani long givim komyuniti sevis long kiarapim ples na helpim ol manmeri long Westen Provins na arapela ples insait long PNG.

Taim gavman i bin tekova long Ok Tedi Main,


dispela tekova i bin stopim PNGSDP long mekim mani na givim developmen sevis long ol pipel, Sir Mekere i tok.

"Tasol mipela nau i wok long inves na yusim ol mani long groim Long Tem Fan bilong ol pipel bilong Westen Provins," Sir Mekere i tok.

Em i autim dispela toktok long las wik taim em i laik givim ripot bilong PNGSDP taim ol i bin pinisim anual jeneral miting bilong kampani long Pot Mosbi.

"Namba wan samting PNGSDP i was gut na lukautim ol mani bilong pipel bilong Westen Provins i stap long Long Tem Fan," Sir Mekere i tok.

Sir Mekere i tok dispela Long Tem Fan i stap gut



Sir Mekere Morauta - OL developmen i hat long kamap long Westen provins bikos gavman i tekova long Ok Tedi maining kampani.

stret, maski ol prais bilong ol komoditi i pundaun na PNGSDP i lusim Ok Tedi Main.

"Mani mak bilong Long Tem Fan ya nau i stap long mani mak \$US1.3 bilien. Long PNG Kina, dispela fan ya i bin stap long K3.4 bilien, tasol nau em i gro i go antap long K3.9 bilien," Sir Mekere i tok.

Sir Mekere i tok sekyuriti

bilong dispela Long Tem Fan ya em i namba wan wok bilong PNGSDP bikos ol pipel bilong Westen Provins long bihain taim bai kisim benefit long dispela fan.

"PNGSDP nau i wok long glasim na lukluk gen long ol invesmen strateji long groim ol invesmen na mani bilong ol pipel," Sir Mekere i tok.

Nupela BSP brens long Vanuatu

BIKNEM benk bilong PNG na Saut Pasifik, Benk South Pacific (BSP), i opim nupela brens long Vanuatu.

Dispela em i namba wan taim BSP bai gat operesen long Vanuatu bihain long em i baim olgeta brens long Westpac long dispela Saut Pasifik kantri.

Long Mande dispela wik, BSP i statim benking bisnis long Vanuatu we planti manmeri i bin kam long Pot Vila brens bilong BSP benk arere long Kumul Haiwe.

Siaman bilong BSP bod ov dairekta, Sir Kostas Constantinou, i tok BSP i baim pinis ol opresen bilong Westpac long Pot Vila.

Sir Kostas i tok long Januari 29 long las yia, BSP i bin sainim wanpela agrimen long baim ol opere-sen na brens bilong Westpac long Samoa, Cook islands, Tonga, Solomon islands na Vanuatu.

Tasol Benk ov PNG (Sentral



Ol nupela kastoma bilong BSP i laik go insait long Pot Vila brens bilong BSP benk long Mande dispela wik bihain long BSP i tekova long ol operesen bilong Westpac long Vanuatu.

Benk) arapela sentral benk bilong dispela ol kantri i bin givim laspela tok orait long lari BSP i tekova long ol brens bilong Westpac.

"Long Julai 2015, mipela i bin pinisim olgeta wok bilong baim ol operesen bilong Westpac long

Cook islands, Samoa na Tonga.

"Long Oktoba 2015, mipela i baim olgeta brens bilong Westpac long Solomon Ailans (SI). Bikos long hevi Vanuatu i bin bungim taim strongpela win Saiklon Pam i bin bagarapim ples, BSP i bin wet

Sir Kostas i tok long 1 Julai 2016, BSP i pinisim olgeta wok na statim opresen bilong nupela brens long Pot Vila.

BSP Grup Sif Eksekutiv Opisa, Robin Fleming, i tok BSP i bihainim Pasifik ekspensen strateji bilong en long baim ol brens na operesen

inap 2016 long stre-tim ol pepa wok long larim BSP i baim ol brens bilong Westpac long Vanuatu," Sir Kostas i tok.

Em i tok Risev Benk bilong Vanuatu i bin givim tok orait long larim BSP i tekova long Westpac Benk long Vanuatu long 11 Novemba 2015 na pinisim dispela trenseksen long 1 Julai 2016.

bilong arapela benk na opim nupela brens long arapela kantri insait long Pasifik rijon.

Pasifik ekspensen strateji em i wanpela bisnis plen bilong BSP long opim nupela brens long arapela ol Pasifik Ailan kantri na ol i bin statim dispela plen long yia 2006.

Ausait long PNG, nau BSP i gat brens long 6-pela Pasifik Ailan kantri na em ol, Solomon Ailan, Fiji, Vanuatu, Tonga, Samoa na Cook Ailans.

"BSP em i wanpela biknem benk bilong PNG na mipela i wok long painim sans bilong mekim bisnis long arapela Pasifik Ailan kantri, na groim bisnis bilong mipela wantaim ol nupela brens," Mista Fleming i tok.

Em i tok dispela nupela tekova bilong Westpac long Vanuatu bai helpim ol nupela kastoma long yusim gut ol fainensal sevis long laip bilong ol," Mista Fleming i tok.

SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer



WE ARE **BSP**

Pasin korapsen i kamap long Unggai-Bena

MINISTA bilong Lens na Pisikal Plening na Memba bilong Unggai-Bena Iektoret, Benny Allan i tok, Unggai-Bena distrik i rausim pinis planti treseri opisa bilong en bikos long pasin korapsen i kamap long rot bilong yusim ol Distrik Sevis Impruvmen Program (DSIP) mani long las yia.

“Ol distrik tresera long kantri i kamap olsem ol korap pablik sevan,” Mista Allan i tok.

Minista Allan i bin mekim dispela toktok long taim em bringim 2015 DSIP akwital ripot bilong Unggai-Bena distrik i go long Di-patmen bilong Implementesen na Rurel Developm (DIRD) insait long Palamen haus long Pot Mosbi las wik.

Em i tok, sampela distrik tresera

long kantri i gat bikipela pasin bilong paulim mani bilong gavman na ol i yusim long ol narapela samting we i no bihainim baset bilong ol Distrik Sevis Impruvmen Program o DSIP.

Ol opisa bilong Unggai-Bena distrik treseri i wok long pasim tok wantaim ol kontrakta na ol ausait man, na i no long save bilong Seksen 32 opisa husat i gat pawa aninit long lo long wokim ol pemen long ol sevis distrik i kisim.

Minista Allan i tok wanpela wok painim aut ol i bin mekim long mani mak bilong K26,000 long las yia i bin kamapim olsem i gat planti sek mani ol opisa bilong distrik treseri i bin raitim i go long ol kontrakta na ol lain bilong givim sevis long distrik. Tasol taim wok

painimaut i go, ol i lukim olsem dispela opisa i i no bihainim gut rot bilong ol pepa wok na long kisim tok orait long atoriti.

“Insait long Unggai Bena distrik, mipela i rausim planti distrik treseri opisa bikos ol i no bihainim rot bilong ol pepa wok na mipela i putim ol nupela opisa long was long ol wok bilong treseri. Ol i abrusim sistem.

“Siaman na Seksen 32 opisa husat i Sif Eksektiv Opisa bilong o Distrik Edministret i gat wok long bosim ol mani bilong DSIP, i tok em i no gat save long wanem kain rot dispela mani go long ol kontrakta. i no bin gat wanpela tok orait i kam long opis bilong em i go long ol saplaia na kontrakta,” em i tok.

“Mipela i lukim olsem samting i no stret olsem na mipela i tingting long sekim. i bin gat ol sek we ol i raitim aninit long treseri wok akaun olsem na mipela i kisim ol dispela sek na mipela i go bek long lukim rot em i bin go long en. Ol i no stap long rejista tu,” Mista Allan i tok.

Em i tok olsem DDA Siaman na CEO i no givim tok orait olsem na em i pret olsem sapos ol distrik treseri opisa i wok long pasim tok wantaim ol kontrakta na ol lain bilong bringim sevis, planti milien kina mani bai go lus nating, na i no long Unggai Bena distrik tasol, no gat, ating dispela em i wok long kamap long olgeta hap bilong kantri.

Mista Allan i tok i mas gat gut-

pela sek na balens sistem i stap long ol distrik na ol provins na bai ol i ken painim aut ol rong bilong ol opisa na mekim save long ol.

Isten Hailans Provinsal Edministreta, Solomon Tato husat i go wantaim wanpela tim long givim ripot bilong ol i tok olgeta akwital ripot i mas go long opis bilong em pastaim long ol i go long DIRD long sekim.

“Bikos long ol kain pasin olsem, ol provinsal edministrata i mas go daun long ol distrik na LLG long sekim ol projek na program i kamap tru o nogat. Mipela i no laikim ol giaman ripot,” Tato i tok.

Unggai Bena distrik i bin kisim K10 milien na i bringim moa long K3 milien i go insait long 2016 fiskal yia.

Unggai-Bena Distrik i bringim 2015 DSIP akwital ripot

UNGGAI-Bena Distrik las wik i bin givim akwital ripot bilong K10 milien bilong 2015, tasol K3 milien bilong dispela mani em ol i no yusim na em i go insait long 2016 baset bilong ol projek na program.

Wantaim K7 milien ol dispela projek i bin kamap: Distrik rot mente-nens , K1,000,000.00; Sigerehe- Megunagu rot, K300,000.00; Unggai Hai skul, K3,000,000.00; Skul klasrum na haus tisa, K1,000,000.00; Vokesenel Skil Trening, K300,000.00; Skul fi, K300,000.00; Yabiufa Praimeri Skul haus tisa, K200,000.00; Smol na Midium Enteprais, K400,000.00; Polis Awenes na Pis Midiesen, K300,000.00; Brik Pektori, K400,000.00; Rurel Ilektri-



Minista bilong Lens na Pisikal Plening na Memba bilong Unggai-Bena, Benny Allan i bringim ol 2015 DSIP akwital ripot bilong em i go long DIRD, Ekting Seketeri, Paul Sai'i. Ol distrik opisa i stap long lukim.

fikesen, K300,000.00; Rurel Hausing, K300,000.00; LLG Projek patna fanding, K300,000.00.

Ol narapela olsem long transpot K800,000.00, Komyuniti Developmen

projek K1,400,000.00, egrikalsa na ikonikis K1,650,000.00.

Unggai Bena distrik i bin kisim K10 milien na i bringim moa long K3 milien i go insait long 2016 fiskal yia

Tasol wantaim ol dispela wok kamap, Minista bilong Polis na lokal memba Allan i no amamas long ol distrik opisa bilong treseri i raitim aut sampela sek i go long ol kontrakta na ol narapela lain bilong givim sevis nating long laik bilong ol na ol i no kisim tok orait bilong Distrik Developmen Atoriti (DDA) Siaman, husat i Sif Eksektiv Opisa (CEO) bilong DDA.

Em i tok, DDA Siaman na CEO i no givim tok orait long ol mani we distrik treseri i bin yusim pinis, olsem na em i pret olsem sapos ol distrik treseri opisa i wok long pasim tok wantaim ol kontrakta na ol lain bilong bringim sevis, planti milien kina mani bai go lus, na i no long Unggai Bena distrik tasol, no gat, ating dispela em i wok

long kamap long olgeta hap bilong kantri.

Mista Allan i tok i mas gat gutpela sek na balens sistem i stap long ol distrik na ol provins na bai ol i ken painim aut ol rong bilong ol opisa na mekim save long ol.

Isten Hailans Provinsal Edministreta, Solomon Tato husat i go wantaim wanpela tim long givim ripot bilong ol i tok olgeta akwital ripot i mas go long opis bilong em pastaim long ol i go long DIRD long sekim.

“Bikos long ol kain pasin olsem, ol provinsal edministrata i mas go daun long ol distrik na LLG long sekim ol projek na program i kamap tru o nogat. Mipela i no laikim ol giaman ripot,” Tato i tok.

Tato i tok tenkyu long O'Neill Deon gavman long givim ol bikipela mani i go long ol distrik olsem DSIP, PSIP na LLGSIP, olsem na i mas gat gutpela wei bilong menesim ol dispela mani long gutpela developmen inap kamap long stretim sindaun bilong ol biklain long rurel eria.

Ol memba i pilai politik wantaim ol LLG Presiden

KUNDIAWA Taun Meya i tok ol Memba bilong Palamen long provins i wok long pilai politik na i no wok gut wantaim ol Lokal Level Gavman (LLG) Presiden long wok bung wantaim long bringim ol besik sevis.

Maiya Wapia Kuglame i tok strong olsem bikipela mani bilong Provinsal na Distrik Sevis Impruvmen Program gren (PSIP na DSIP) i bin go long Simbu provins tasol ol lida i no mekim wok bilong ol long putim hap mani bilong ol projek na ol program long mekim dispela wok.

Kuglame i tok klia long dispela long taim em i givim ol 2015 LLGSIP akwital ripot bilong em i go long Di-patmen bilong Implementesen na Rurel Developmen (DIRD) long Pot Mosbi aste.

Mista Kuglame i tok gavman i daunim mani mak bilong K500,000 i go daun K100,000 tasol bilong 2015 na 2016 fiskal yia, inap tasol long wokim o bikipela wok projek na program we bai helpim ol pipel.

“Mi tok pait wantaim Provinsal Eksektiv Kaunsil memba long putim sampela mani aninit long PSIP bilong Kundiawa taun wara projek, tasol i no kamap.

“Kundiawa em i wanpela liklik taun na sapos ol lida man olsem ol nesenel MP i wok bung wantaim olsem wanpeal tim, em i mas gat

developmen. Yu lukik ol liklik projek olsem silim rot long taun, stretim ol maket, wara saplai, stretim pablik toilet, em ol sevis we ol pipel i nidim,” em i tok.

Meya i tok strong olsem ol lida long provins i no save sapotim ol LLG Presiden long pinisim ol projek bilong ol, tasol ol MP i save mekim wok bilong ol yet.

Em i tok olsem, maski Nesenel Ikonmik na Fiskal Komisen (NEFC) i putim mak bilong Simbu olsem em i stap antap tru namel long 19 provins long kantri long bringim ol besik sevis, tasol em ol i no trupela tok.

Kundiawa LLG i bin kisim K1 milien long 2013- 2014, tasol long 2015 tasol ol i kisim K100, 000 bikos long mani mak bilong ol LLGSIP gren i go daun insait long kantri.

Long 2013, ol 114 LLG i givim ol LLGSIP akwital ripot pinis tasol 200 LLG i no yet, na long 2014, ol 29 LLG tasol i givim ol akwital ripot na bikipela namba 285 i no givim yet.

Nesenel Gavman i daunim LLGSIP gren bilong K500,000 long wan wan LLG i go long K100,000.

Nau i luk olsem ol LLG Presiden i no wok long givim akwital ripot bilong ol na ol LLG Presiden na ol Menesa i mas mekim dispela bikos em i wok bilong ol long lukautim ol pablik fan i go long DIRD.



Kundiawa Taun Meya na LLG Presiden Wapia Kuglame i givim 2015 LLGSIP akwital ripot i go long Fes Asisten Seketeri bilong Hailans na Sauten Rijon long DIRD, Aihai Vaki. Foto: Samson Kendeman



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon: 325 2500 o Mobail namba: 7384 6688 o email i kam long: seovo@wantokniuspepa.com

Minista Zeming laikim moa sapot long kostal piseris sekta

James G. Kila i raitim

MINISTA bilong Fiseris na Marin Risos, Mao Zeming i givim bikipela tok tenkyu na luksave bilong em i go long gavman na pipel bilong Japan long sapot ol i givim long kostal piseris sekta long PNG.

Mista Zeming i tok dispela sapot bilong Japan i strongim ol liklik manmeri long ples long wokim liklik bisnis long salim pis long maket bikos Japan i helpim long sanapim nupela maket long strongim na sapotim dispela indastri.

Em i givim dispela tok tok bihain long gavman bilong Japan i wokim kamap tupela fiseris maket long PNG long Wewak na long Madang.

Em i mekim dispela toktok taim em i stap long opening bilong nupela Madang taun maket na piseris bris klostu las wik Fraide long Madang.

Minista Zeming i tok piseris sekta i no stap tasol long tuna indastri we gavman i wok long givim moa luksave long



Fiseris na Marin Risos Minista, Mao Zeming.

en. Em i stap long kostal piseris tu we ol liklik manmeri long ples i stap insait long wok bisnis bilong pulim pis na salim na helpim sindaun bilong famili na komyuniti na sosaiti bilong ol.

Em i tok gavman i mas lukluk moa long kostal piseris sekta bikos em i lukautim laip bilong moa long 2.5 milien pipel long ol kostal na ailan komyuniti long PNG long sait long kaikai, kamapim mani na tu long sait long marasin na ol arapela samting.

Mista Zeming i tokaut stret olsem luksave bilong gavman i wok long pas moa long komesal pising tasol, na ol i lukluk long tuna bisnis.

“Em tru olsem tuna o fising indastri long bikipela solwara em gutpela long strongim ekonomi bilong PNG, kostal fiseris em bikipela samting tu long PNG bikos em strongim stret ol liklik manmeri long ples,” Minista Zeming i tok.

Minista Zeming i tok em i amamas olsem gavman bilong Japan i wok long sapotim kostal piseris long PNG wantaim sapot bilong Nesenel Fiseris Atoriti (NFA). Tasol em i tok moa wok i mas kamap long strongim ol arapela program long kostal piseris sekta we i ken lukim em i gro na soim olsem em i ken helpim stret ikonomi bilong kantri.

Em i tok tu olsem gavman i mas lukluk gen na givim moa luksave long developmen bilong kostal piseris sekta long sapotim ol manmeri long ples.

Karamui Nomane namba wan long givim DSIP ripot

KARAMUI Nomane i kamap namba wan distrik long Simbu provins long bringim ol 2015 long K10 milien mani bilong Distrik Sevis Impruvmen (DSIP) akwital ripot i go long Dipatmen bilong Implementesen na Rurel Developmen (DIRD) long Pot Mosbi dispela wik.

Long taim bilong givim ol ripot, Sif Eksekutiv Opisa (CEO) Limbia Tiagoba i tok olsem Karamui Nomane em i wanpela ples i stap longwe tru insait long ol maunten bilong Simbu Provins. Rot bilong en i balus tasol long planti yia nau.

Tiagoba i tok planti DSIP mani bilong ol i bin go long helpim skul fi bilong ol sumatin i skul long ol kain kain institusen long kantri bikos ol i bilip long developim save bilong ol pipel pastaim na bihain

bai bringim developmen long distrik.

Insait long ripot, ol i soim olsem distrik i bin yusim moa long K4 milien long edukesen sabidi program stat long yia 2013, na wantaim dispela mani ol i bin helpim 596 sumatin o moa.

Tiagoba i tok, bikos distrik i stap long hatpela ples i longwe, ol i bin putim ol sola lait long distrik stesen, tupela helt senta, 4-pela etpos na 16 haus bilong ol pablik sevan.

Em i tok bikipela hap baset i go long transpot infrastraksa wantaim K8, 391,928, bikos distrik i gat tingting long stretim na opim gen ol rot na bris we bai bringim developmen i go insait.

“Mipela i gat populesen o kaunsim bilong ol pipel i stap long mak i moa long 50,000 na mipela i no gat rot, tasol Salt na Nomane

LLG i gat rot namel long ol. Mipela tromoi K300 long kisim wan we tiket long balus tasol mipela i strong yet na bringim ol bikipela sevis i go long ol pipel na ol i save stap,” em i tok.

Wantaim ol dispela projek, ol narapela projek i kamap aninit long Karamui Nomane Distrik Developmen Atoriti em: Malti-midia Senel televisen tawa, K350,000; Elk Entelop LNG na Maun Crater risos papa graun ILG rejistresen, K238,000; Komyuniti Sevis, K400,000; Hausing projek K2,600,000, bilong wokim ol haus antap long graun bilong distrik hetkwata len edministresen, helt, edukesen bilding konstraksen; Lo na jastis, polis kar na ol gan, K60,000.00; Jeneral Edministresen, K2,333,200. Ol i baim tupelo trak, 7-pela moto saikel, kirapim

nupela Karamui LLG Semba, baim graun bilong kirapim nupela distrik Hetkwata, haus bilong ol wokman wantaim sola lait.

Deputi Seketeri bilong DIRD, Jackson Why i tok, planti provins na distrik wantiam ol lokal level gavman long kantri i no givim ol PSIP, DSIP na LLGISIP akwital bilong ol i go long DIRD yet.

Mista Why i tok, olgeta akwital bilong ol Sevis Impruvmen olsem PSIP, DSIP na LLGISIP na ol konstitusenel gren, Provinsal na Distrik Sapot Gren i mas go long DIRD tasol.

Em i tok sapos ol provinsal, distrik na lokal level gavman i bringim ripot i go long ol narapela dipatmen o ejensi bilong gavman, em bai ol i no inap givim luksave long ol, na ol bai i no inap larim ol narapela fanding moa long i go long ol tripela hap han bilong gavman.

UPNG Kaunsil i pasim 2016 skul yia

EKTING Sansela bilong Yunivesiti bilong Papua Niugini (UPNG), Nicholas Mann wantaim sapot bilong ol yunivesiti kaunsil senet i tokaut long Tunde dispela wik olsem ol i pasim nau 2016 yia bilong skulim na lainim ol sumatin.

Em i tok ol i pasim bikos long ol bikipela hevi we i kamap long ol sumatin, tisa na ol samting insait long yunivesiti kempas long Pot Mosbi.

Long wanpela nius toksave, kaunsil i tok olsem ol i bin holim planti miting we ol i tokaut yet long bikipela laik bilong Yunivesiti long givim ol akademik stadi long ol sumatin. Tasol ol i no inap nau long mekim dispela bikos, i gat ol man ausait wantaim sampela sumatin husat i wok long mekim ol narapela sumatin i pret long laip bilong ol na ol i no inap long stap gut long skul kempas.

Olsem na ol i pasim 2016 akademik ektiviti, stat long dispela wik yet. Tok save pepa i tok, UPNG i gat wok aninit long lo bilong kantri long trenim eduketim na kamapim ol lain i greduet wantaim ol kwaliti na standet edukesen long karim aut ol wok developmen na ol nid bilong wokman na wokmeri long Papua Niugini.

Long wokim dispela, yunivesiti i mas gat gutpela hap we ol sumatin i no ken pret long birua o



UPNG Kaunsil i sindaun long mekim disisen long skul yia bilong yunivesiti.

Poto: Nicky Bernard.

long kisim bagarap. Tasol long dispela taim, UPNG Ekting Sansela na ol lain komiti bilong en i lukim olsem em i no seif moa long ol sumatin long stap insait bikos long hevi we ol Sumatin Representativ Kaunsil (SRC) i bin statim long Me 2, dispela yia.

Ol pasin we SRC bilong skul i bin statim long Me 2, 2016 i go na kamapim ol birua insait long kempas we i bagarapim tingting bilong planti sumatin na ol wokman na wokmeri bilong yunivesiti. Ol i no

bihainim lo moa na ol i kamap olsem ol lain bilong traibel pait we ol i penim pes, na singaut long pait wantaim ol bus naip.

Ol pasin we i kamap long Fonde, 23 Jun, 2016 na Fraide 24 Jun, we ol i bin kukim sampela ol kar insait long yunivesiti we wanpela bilong ol dispela kar em i wanpela praivet kar, ol i kukim wanpela bilding, i senisim ples long yunivesiti i go long lo na oda. Long dispela as, nau i gat kefiu o taim bilong tambu long wokabout

raun insait long eria bilong UPNG, stat long Sande 26 Jun long ol bai traim long stetim sindaun i go bek olsem pastaim.

Pastaim long skul bai stat long UPNG, kaunsil senet i laikim gutpela na seif sindaun i mas kamap long tingting bilong ol wokman na wokmeri na long ol sumatin. Dispela em i no isi long mekim insait long sotpela taim olsem. Mipela i kisim toktok i kam long planti ol stekholda olsem Gavman na mipela i glasim ol gut. Mipela i

kisim ol toktok bilong olgeta stekholda wantaim Gavman na mipela i glasim gut.

Long gutpela bilong UPNG long bihain taim, long ol skul program, Kaunsil i tingting i go na nau mipela i wanbel long toktok bilong Akademik Senet long pasim 2016 program bilong skulim na lainim tasol. Ol narapela akademik ektiviti olsem ol risets, pos greduet supavisen, komyuniti autris na edministretiv wok bai i no inap long stop.

Nupela jenereta makim gutpela taim bihain

WOK bilong Bogenvil Teknikal Koles long kamapim ol gutpela saveman na meri long greduet, nau i gat nupela pawa jenereta i gat moa pawa long kamapim ilektrisiti.

Koles Prinsipel, Joe Beno na Australia Hai Komisina, Bruce Davis, i bin opim dispela 65 KVa jenereta. Dispela jenereta bai givim 3 fes pawa long ol opis, mes o haus kaikai, woksop na ol haus bilong ol wokman na wok-meri na ol sumatin insait long teknikal koles.

Mista Beno i tok nupela jenereta bai helpim koles long givim gut ol kos long givim save bilong indastri, bisnis na long gutpela bilong Bogenvil komyu-niti.

“Nupela jenereta bai givim ilektrisiti we koles i nidim long wokim ol trening olsem long welding na otomotiv treid na kapentri we i save kisim moa pawa,” Mista Beno i tok.

Mista Beno i tok dispela

jenereta bai helpim ol komyuniti klostu long koles tu.

“Ol lokal pipel i save kam long koles long yusim skul bilong wokim ol trening bilong ol. Wan-taim dispela nupela jenereta, mipela bai inap long helpim ol long ranim ol dispela kos bilong ol,” em i tok.

Wok bilong sanapim jenereta i karamapim tu ol wok bilong putim ol pawa rop na ol banis bi-long pasim klaut i pairap bai no inap kisim ol haus na tu long was long ol hevi bilong ilektrisiti.

Australia Hai Komisina, Bruce Davis i tok olsem em i amamas long ol tisa husat i bin helpim long ol wok bilong sanapim jenereta, na em i tok kain pasin olsem bai lukim dispela jenereta inap stap longpela taim long koles.

Australia Gavman wantaim wok bung bilong Papua Niugini

Australia Hai Komisina, Bruce Davis i katim ribon long opim wok bilong nupela jenereta.



TribeFM Teen Ekselens Awot 2016

Nominetim ‘Teen Hero’ bilong yu

Yu save long wanpela yangpela man o meri husat i soim pasin bilong lidasip na save long planti wok insait long komyuniti?

2016 nupela TribeFM Teen Ekselens Awod bai selebretim 7-pela yangpela man na meri bilong olgeta hap bilong Papua Niugini, krismas bilong ol namel long 13 na 19 husat i soim olsem ol i gro o senisim pasin, lidasip na ol i gat komitmen long komyuniti ol i stap long en.

OL KATEGORI NA KRAITIRIA

Ol nomini i mas soim ol ko veliu bilong gro o senisim pasin, lidasip na komitmen.

HELT NA WELFE

Dispela yangpela man o meri bai soim olsem em i gat strongpela pasin bilong kamapim gut helt bilong em na bi-long ol narapela husat i stap insait long komyuniti bilong ol wantaim ol ektiviti we i save strongim ol tingting na pasin bilong gutpela helt long ol skul, famili na ol komyuniti grup.

MUSIK NA ATS

Em bai soim olsem dispela yangpela man o meri i gat namba wan kain save na stail bilong ats na music na sapela taim em i yusim long kamapim senis insait long ol komyuniti bilong em.

SPOT

Dispela yangpela man o meri bai soim gutpela pasin bilong stap strong long spots na i pilai gut tru na em i yusim save na stail bilong em long kamapim gutpela sindaun long komyuniti.

KOMYUNITI

Dispela yangpela man o meri i soim olsem em i save tingim nid bilong ol narapela pipel pastaim long em yet, na em i save givim ol taim bilong em yet na strong bilong em long helpim komyuniti bilong em.

EDUKESEN

Dispela yangpela man o meri husat i soim olsem em i save mekim gut long edukesen bilong em o i kamap gut long skul bilong em, o husat i gat stori long em i save helpim ol narapela lain long lainim samting.

BISNIS NA INOVESEN

Dispela yangpela man o meri i mas soim olsem em i save painim ol nupela kain we bilong wokim samting na i mekim wanpela wok bisnis we i helpim em yet na komyuniti bilong en.

DISABILITI

Dispela yangpela man o meri i mekim senis long helpim ol lain husat i gat disability, na tu ol yangpela man na meri husat i gat disability tasol i wok long senisim laip bilong ol yet na bilong komyuniti tu.

WEI BILONG NOMINETIM MAN

Pulimapim dispela fom wantaim olgeta stori bilong wanem yangpela man o meri yu laik nominetim. Sapos yu lusim sampela hap bai mipela i no inap kisim fom bilong yu.

Ol entri i MAS kam insait long 5 klok apinun long Fraide 22 Julai 2016.

Plis givim fom bilong yu i go long TRIBE 92FM long wanpela bilong ol dispela kain wei:

Salim pas: Tribe92FM, NBC, P O Box 1359, Boroko. Port Moresby, PNG.

Yu yet bringim i go long wanpela provinsal NBC OPIS klostu long yu

Salim long Fesbuk pes bilong TribeFM (salim wanpela poto bilong fom yu pulimapim pinis)

Salim long Whatsapp i go long 70199105 (salim wanpela poto bilong fom yu pulimapim pinis)

Yu ken ring long telepon namba 325 3439 namel long 8.30 moning taim i go long 4.30 long apinun, Mande i go Fraide o salim email long wgorogo@nbc.gov.pg.

NOMINETIM ‘TEEN HERO’ BILONG YU LONG NUPELA TRIBE92FM TEEN EKSELENS AWOT

Plis TIKIM WANPELA bilong ol dispela kategori long nominetim TEEN HERO bilong yu:



HELT NA WELFE



EDUKESEN



DISABILITI



SPOT



KOMYUNITI



BISNIS NA INOVESEN



MUSIK NA ATS

STORI BILONG NOMINI (Teen Hero):

Nem bilong em: _____

Adres bilong em: _____

Bon De: _____

Fon namba bilong em: _____

STORI BILONG NOMINETA:

Nem bilong em: _____

Rilesensip bilong Teen Hero bilong yu wantaim yu (papamama, tisa, Sios lida):

Adres bilong yu: _____

Fon namba bilong yu: _____

Long narapela hap pepa, tok klia long wanem as na Teen Hero bilong yu i mas kisim luksave long dispela yia Awot bilong TTEA. Pasim dispela pepa wantaim dispela fom.

Yu **MAS** soim klia ol **sampela eksampel** bilong soim wok we dispela yangpela man o meri i soim long gro bilong em yet, lidasip na komitmen long kategori yu wok long nominetim em.

Ol Lo bilong go insait:

- Em i op long olgeta lain i stap insait long PNG
- Krismas bilong ol nomini i mas stap namel long 13-19
- I ken nominetim ol grup/tim
- Ol nominesen i mas stret na i kam stret long yu
- TribeFM bai makim sampela lain long skelim na makim
- Sapos ol jas i lukim olsem i no gat gutpela lain long wanpela kategori, bai i no gat awot long dispela kategori
- Ol lain i stap long fainel mak bai kisim toksave long telepon
- Ol wina bai kisim awot/fainensel sponsasip we bai ol i mas yusim gen long wanem kategori ol i win long en
- Nem na poto bilong ol wina bai kamap long ol midia

Sapot i kam long:





Ol plaua gel bilong Asaro i sanap wetim ol bikman bilong Saut Korea i kam opim haus sik bilong Daulo Distrik.

Ol plaua gel bilong Asaro

OL graun tais man bilong Asaro long Isten Hailans i gat bikpela nem long Papua Niugini na tu ol i stap long wol mep.

Ol i stap antap long wol mep i min olsem taim ol turis bilong ovasis i save kam raun long kantri bilong yumi na skruimraun bilong ol i go long Goroka na draiv i go antap long

Asaro long Daulo distrik we i asples tru bilong madmen, ol i save lukim stret ol originel tais graun man.

Na i no dispela tasol, nogat. Igat ol tais graun meri tu i stap.

Tasol ol yangpela meri long dispela taim i senisim pasin tumbuna liklik long hap we ol i wok long

putim ol naispela tumbuna bilas olsem dispela ol yangpela plaua meri i bin mekim kamap long taim bilong opim bilong nupela rurel haus sik em Korea Intenesenel Kopresen Ejensi (KOICA) i bin givim i go long ol pipel bilong Asaro long Fraide wik i go pinis.

Kala bilong meri Asaro i gat kik

Loutova Siapela
i raitim

LONG taim bilong ol bikpela bung, ples i save paia stret long taim ol man, meri na pikinini i save putim ol naispela kala tumbuna bilas na kamap long dispela ol bung.

Na long dispela yangpela meri bilong Asaro long Daulo distrik long Isten Hailans, taim bilong

opim nupela rurel haus sik long Asaro, em i bikpela samting tru long em.

Olsem na em i putim naispela kalakala tumbuna bilas na kamap long selebret wantaim ol arapela wanpinis bilong em long taim Minista bilong Helt, Michael Malabag na Embaseda bilong Saut Korea, Kim Seong Choon, i bungim em.

Ol i sanap kisim poto wantaim em long taim tupela man i lukluk raun long nupela helt bilding long Asaro.

Dispela haus sik em ol pipel na gavman bilong Saut Korea i givim olsem wanpela spesel presen i go long ol pipel bilong Asaro na Daulo Distrik.

Em bai givim helt sevis i no long ol pipel bilong Asaro na Daulo distrik tasol, nogat.

Em bai sevim ol lain bilong ol arapela hailans provins tu olsem Simbu, Jiwaka, Westen na Sauten Hailans, Enga, Hela na ol arapela lain Papua Niugini tu husat i save raun i go i kam long bikpela Okuk Haiwe.

Helt Minista, Michael Malabag na Embaseda Kim Seong Choonem ol bikman husat i opim dispela haus sik.



Meri Asaro i soim kala stret taim bilong opim nupela hausik long Daulo distrik long Goroka. Hia minista bilong Helt, Michael Malabag na Embaseda bilong Saut Korea, Kim Seong i sanap wantaim yangpela meri Asaro wantaim kala bilas bilong em.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867

TOLL FREE NUMBER 16111 | Email: reservations@pngair.com.pg

Ramu NiCo sip sevim ol lain bungim hevi long solwara

James G. Kila i raitim

WOK SIP bilong Ramu NiCo Menesmen MCC MV Carrie i bin wokim wanpela bikpela helpim taim em i sevim 12-pela lain husat i lus long bikpela solwara namel long Raikos na Madang long Mande, July 4, 2016.

Namel long ol dispela lain em 12-pela bikman meri na tripela pikinini na ol i ran long banana bot lusim ples bilong ol long Mur long Saidor lokal level gavman (LLG) na laik go olsem long Madang taim ol moto bot ol i ran long en i bungim hevi long enjin namel long solwara na ol i trip i stap. Ol i bin trip long solwara samting olsem 15 kilomita longwe long Madang taun taim wok sip bilong Ramu NiCo i lukim ol na sevim ol.

Kepten bilong mv Carrie, Charles Buai i tok dispela



Kru bilong mv Carrie Guyu Yeges i was long baklain na pulim bot bilong Raikos namel long solwara bilong Astro-labe Be.

banana bot i wok long trip namel long bikpela tait long solwara na bikpela win na solwara tu i kirap long dispela taim long samting olsem 11:30 long moning.

Em i tok ol pasindia antap long bot i wok long

singaut na tromoi laplap na wokim ol sain long soim olsem ol nidim stret helpim.

Kepten Charles i tok olsem bikpela solwara i kirap long Mande moning namel long Madang na Basamuk taim ol i ran i go

olsem long taun, na em wantaim ol kru bilong em i lukim dispela bot bilong Raikos wantaim ol pasindia i trip nating i stap na nidim stret helpim olsem na em i tanim sip long helpim ol.

Kepten Charles i tok antap long bot ya, i gat wanpela tisa bilong Mur Praimeri skul wantaim sampela ol asples lain i laik go salim vanilla bilong ol long Madang taun. Tripela pikinini tu i bin stap antap long bot.

Wanpela pasindia long bot Kelly Waidai i makim maus bilong ol arapela long givim bikpela tok tenkyu bilong ol long Kepten Charles na kru bilong mv Carrie long helpim bilong ol.

"Mipela tok tenkyu tru long Papa God i bringim sip bilong MCC long sevim mipela long dispela taim nogut taim mipela i ting olsem mipela bai lus long bik solwara...." Waidau i tok.

Kampani bilong israel bai kirapim faktori long Enga

PROVINSAL gavman bilong Enga na wanpela kampani bilong Israel i sainim pinis wanpela agrimen long kirapim wanpela bikpela faktori bilong prosesim o kamapim ol prodak wantaim swit potato.

Innovative Agro industry Limited (IAI) na Enga Provinsal Gavman i sainim dispela agrimen long kamapim larim IAI i kirapim dispela faktori long planim na kisim swit potato long Talum-Surunki.

Long wan wan yia, IAI bai prosesim swit potato na salim i go long Fiji, Australia, Nu Silan na arapela kantri, we dispela projek bai mekim K500 milien long wan wan yia.

Siaman bilong IAI, Ilan Weis, na Enga Gavana Sir Peter Ipatas i sainim agrimen long kirapim dispela projek long Surunki long las wik.

Mista Weis i bin kisim sampela bisnis man bilong israel i go antap long Wabag, na em i putim wanpela ston we em i bin kapsaitim oil bilong

oliv antap long en.

Dispela i makim pasin bilong strongim dispela agrimen namel long IAI na Enga Provinsal Gavman na long statim dispela projek.

"Dispela pasin i laik kapsaitim oliv oil na putim dispela ston em long kirapim nupela bris na pasin poroman namel long manmeri bilong Israel na Enga.

"Mi bilip olsem dispela kampani (IAI) bai stap long hia longpela taim na hlepim ol manmeri long kisim wok na mekim mani,"Mista Weiss i tok.

IAI na Enga Provinsal Gavman i putim K12 milien long staim dispela projek. Sir Peter i tok Nesenel Gavman bai givim K11 milien gen long helpim dispela projek i kamap.

"Mi amamas long lukim olsem IAI i makim wanpela gutpela disisen long kam long Enga na inves long hia. Mipela bai sapotim dispela projek," Sir Peter i tok.



Department of Labour and Industrial Relations
(Office of the Secretary)

PUBLIC NOTICE

Minimum Wages Determination of No 1 of 2014 Implementation

This is to advise, employing organizations, companies, workers/employees, other employing organizations, and the General Public the following:

National Minimum Wage Movement, 3rd phase under the Determination.

The National Minimum Wage, the 3rd and final phase will increase from K3.36 to K3.50 per hour for all minimum wage earners, and will take effect on 3 July 2016, in accordance with Clause 5.3, of the 2014 Minimum Wage Determination.

Annual Review

There will be an annual review conducted on exemptions given to employers under Partial Payment of Minimum Wages in the Agriculture Sector (Clause 6), and under In- Capacity - to -Pay (Clause 7).

Applications are invited from Employers/ business organizations and employing organizations for consideration under these clauses of the Determination, and are to be submitted by close of business, on 15 July 2016 to:

Secretary
Department of Labour and Industrial Relations
Level 3, Gaukara Rumana, Wardstrip Road
P.O.Box 5644
BOROKO
National Capital District

Application forms can be picked up from the Secretariat Office, on 3rd Floor, Policy & Research Division, or at Provincial Labour Offices in the respective provinces. Temporary contact numbers are 79905935 and 71281069, a/Director, NTCC Secretariat and a/Manager, Policy & Research, respectively.

Authorized by:

MARY MOROLA

Secretary & Chairperson, Minimum Wages Tripartite Technical Committee

UN Spesel Envoi sekim wok bilong El Nino rispons

Frieda Sila Kana i raitim

YUNAITET Nesens (UN) Spesel Envoi bilong Jeneral Seketeri, Embeseda Macharia Kamau, i bin kam raun long Papua Niugini, las wik long luksave long wanem kain wok i stap long kantri bai helpim ol pipel husat i bin kisim bikpela bagarap long El Nino o taim bilong strongpela san long las yia i kam inap nau na tu long ol helpim we bai go het yet long bihain taim.

Embeseda Macharia Kamau, em i UN Representativ bilong kantri Kenya long UN het opis long New York, tasol i no long taim i go pinis Seketeri Jeneral bilong UN i makim em olsem wanpela spesel envoi bilong makim em long raun long sampela hap bilong wol long painimaut long hevi bilong El Nino na Klaimet Senis na wanem kain helpim ol gavman na ol narapela lain stekholda i wok long givim long helpim ol pipel.

Em bai go bek long UN opis long New York na givim ripot long wanem kain we o hamas mani, UN i ken painim long helpim ol pipel husat i kisim bikpela bagarap long El Nino na long helpim ol kantri



L-R Yunaitet Nesens Residen Kodineta, Roy Trivedy, Ambassador Macharia Kamau, US Seketeri Jeneral Spesel Envoi bilong El Nino na Klaimet i toktok long ol midia bihain long wokabaut raun i go long Kiriwina Ailan long las wik. Poto: Frieda Sila Kana.

long ol i ken helpim ol yet long bihain taim.

Long Trinde las wik, Embeseda Kamau i bin bin sindaun wantaim Dairekta bilong Nesenel Disasta na Imejensi, Martin Mose wantaim UN Resident Kodineta, Roy Trivedy na ol narapela egensi bilong UN long kantri wantaim ol PNG gavman ejensi olsem ol opisa bilong Dipatmen bilong Egrikalsa na Laipstok na ol narapela patna bilong developmen long kantri, ol

Nesenel NGO na ol Intenesenel NGO long wanpela bikpela miting bilong skelim toktok bilong ol wok kamap na ol mani mak we gavman na ol ejensi i putim long wok bilong El Nino na Klaimet Senis.

Bikpela tingting bilong Embeseda Kamau em bilong save long hamas mani bilong dispela kantri stret em gavman i putim i go insait long helpim ol lain husat i kisim hevi long El Nino na ol hevi bilong Klaimet Senis. Insait long

dispela miting ol kain lain olsem Wol Fud Ogenaisesen, CARE, PNG Sios Patnasip, UNDP, PNG Red Cross, Australia Gavman (DFAT) na ol narapela i givim ripot long wanem kain wok ol i mekim na hamas mani ol i bin putim pinis long helpim ol pipel.

Tasol, Embeseda Kamau i no wanbel long wanem kain toktok i kamap long hamas mani em bilong gavman bilong Papua Niugini yet i putim. I no gat wanpela klia

bekim bilong dispela ansa.

Tasol dairekta bilong Nesenel Disasta na Imejensi i bin tok olsem PNG Gavman i putim mani mak bilong K25 milien i go pas long ol wok bilong helpim ol pipel na narapela K178 milien moa we ol Memba bilong Palamen anini long DSIP mani na ol narapela gavman ejensi i bin tromoi long helpim ol pipel long ol provins we i bin kisim bagarap long taim bilong El Nino.

Embeseda Kamau i bin go long Trobriand Ailan na lukluk raun long tupela ples long bikpela Kiriwina Ailan long Fraide 1 Julai. Em i bin kam raun wantaim tripela opisa bilong UN, Markus Werne bilong UN OCHA Rijonal opis bilong Esia Pasifik, Alice Clements, Komyunikesen Speselis na Spesel Asisten bilong Yut na Globol Patnasip long Dievelopmen Saiens Teknoloji na Inovesen na Polisi, Mumbi-Michelle. Bihain long PNG, Embeseda wantaim tim bilong em i go long Rome long wanpela bikpela miting wantaim ol Dipatmen bilong Egrikalsa long wol, long toktok bilong ol kaikai we bai inap long stap longpela taim long helpim ol pipel.

Nupela developmen long Goroka haus sik



Piksa long antap i soim graun wok bilong bikpela projek bilong Goroka Provinsal Haus sik long Isten Hailans. Mani mak bilong dispela mesa projek em tu handet milien kina (K200 milien).

Poto: Loutova Siapea.

Loutova Siapea i raitim

DVELOPMEN bilong Goroka Provinsal Haus sik long Isten Hailans em i wanpela bikpela projek we i go het nau we bai i kamap narakain tru long taim projek i pinis long 2019.

Ol pipel bilong Isten Hailans i amamas long bod na menesmen bilong Isten Hailans Provinsal Helt Atoriti (EHPHA), provinsal na nesenel gavman na ol ovasis patna husat i wanbel na wok bung wantaim long kamapim dispela wok bilong stretim haus sik. Haus sik

bai kamap long wol standet we em i ken givim nambawan kain helt sevis long ol pipel bilong Isten Hailans na ol arapela provins husat bai kamap long dispela haus sik.

“Mipela laik lukim dispela tu handet mlien kina (K200 milien) projek i mas kamamp na long lukautim gut ol sikman, meri na pikinini long provins na tu ol lain husat i kam long ol arapela provins,” Joshua Soso, Ekting Sif Eksekyutiv Opisa (CEO) bilong EHPHA i tok.

Mista Soso, husat i bin kisim opis olsem ek-

ting CEO long stat bi-standet we em i ken givim nambawan kain helt sevis long ol pipel bilong Isten Hailans na ol arapela provins husat bai kamap long dispela haus sik.

Em i tok, i tru olsem i bin i gat sampela hevi em i bin i stap bipo long em i kamap na kisim wok. Em i tok dispela em ol hevi bilong taim i go pinis.

“Dispela ol hevi bilong em ol hevi i go pinis. Nau em i taim bilong yumi long kirap na strongim wok bilong pasin bilong wokbung na go het long mekim wok long sevim ol pipel bilong yumi long olgeta

eria bilong haus sik na helt atoriti.

Ol pipel bilong yumi mas lukim senis na developmen, samting we yumi mas wok bung na bringim dispela ol developmen na senis i go daun long gutpela bilong ol bilong yumi olgeta”, Mista Soso i tok.

Em i tok graun wok bilong projek em i stat pinis na i no longtaim ol bilding bai kirap. Na bihain long 3-pela yia, Goroka Provinsal Haus sik bai kirap na i go pas long ol arapela haus sik insait long PNG na Saut Pasifik tu.

SDA Pathfinder go long Goroka Provinsal Haus sik

Loutova Siapea i raitim

OL pikinini long wod 4 bilong Goroka Provinsal Haus sik long Isten Hailans i bin kirap nogut long lukim moa long 20 ol lain Pathfinders bilong Seven De Adventis sios long Mt Gravatt long Brisbane, Australia husat i pulim lain i go lukluk raun na givim ol liklik presen, singsing na beten wantaim ol sik pikinini na mama bilong ol long las wik Fonde.

Ekting Sif Eksekyutiv Opisa bilong Isten Hailans Provinsal Helt Atoroti, Joshua Soso husat i wanpela lidaman bilong SDA sios i save i go pas tu long ol

Pathfinders long Goroka. Em i tok amamas long dispela ol lain memba bilong ol Pathfinders bilong Australia husat i no pret long ol sik pikinini na mama bilong ol long taim ol i lukluk raun long haus sik.

“Mi amamas long dispela ol Pathfinders, long wanem, taim ol i raun, holim ol pikinini, toktok wantaim ol mama, beten na singim ol gospel song long ol, em i bringim pasin amamas na lap o smail long pes bilong ol, samting we bai i ken helpim ol long kamap orait long sik bilong ol”, Mista Soso i tok.

Em i tok, ol sik pikinini na ol mama tu i nidim dispela kain pasin long helpim ol long lusim tingting olsem ol i go long haus sik bikos ol i gat sik.

Mista Soso i tok, dispela ol Pathfinders i kam na i stap inap wanpela wik tasol long wok misin bilong ol long Goroka. Ol i bringim planti amamas pasin i no long haus sik tasol, ol i bringim amamas i go long ol skul pikinini long ol skul na ol wokman na meri long ol kopi faktori tu.

Wan wik bilong ol i pinis long Sarere na long Sande, ol i bin i go bek long ples bilong ol long Australia.



Wanpela memba bilong SDA sios Mt Gravatt Pathfinders long Brisbane, Australia i toktok na bihain em i beten long wanpela sik pikinini na mama bilong em.

Poto: Loutova Siapea.



O'Neill-Dion gavman i gat planti asua

Tru, taim yumi kisim independens i kam inap long las gavman bilong Gren Sif Sir Michael Somare, yumi i no bin bungim kain birua na hevi olsem dispela gavman i wok long kamapim.

Yes, i gat hevi bilong mani i bin kamap taim dispela pati i kisim pawa na ranim daun biutiful kantri bilong yumi PNG.

Nau yet dispela pati gen i kamapim bikipela birua long ol pipel na ikonomi bilong PNG i winim arapela gavman taim yumi kisim independens long 40 yia i go pinis.

O'Neill-Dion gavman i mekim bikipela asua long dispela kantri na bai i go insait long histori buk kantri bilong yumi PNG.

Dispela gavman nau yumi lukim, ol i wok long kirapim paia long yumi, em i no wil o laik bilong God.

Sapos dispela lidasip, tru Papa God i makim, ating bai yumi lukim kala bilong ol wok lida bilong yumi bai go stret na kantri bai ran gut.

Nogat. Em i FOS o LAIK bilong man yet olsem na yumi lukim lidasip i bagarap na kantri i bungim bikipela birua.

Watpo? Bikos, planti lida i no bihainim stretpela rot na kamapim gavman long 2011, olsem na yumi painim hevi.

Yumi lukim 2011 wil, em fos bilong graun olsem na nau yumi ken lukim dispela binatang nogut i digim dispela hul pinis na yumi pundaun pinis na kisim taim nau long lidasip nogut.

Olsem, na sapos yumi glasim gut, olgeta asua i stat long 2011 politikal ku. Yumi stilim na rausim gutpela gavman na lida husat God i bin makim long ranim PNG, em nau, nau yumi bungim hevi.

Tru, sapos yumi glasim dispela kain birua long ol arapela kantri, ol lidamanmeri i save risain o pinis long gutpela nem bilong kantri, politikal pati, lidasip, gutpela nem bilong famili na ol yet. Em trupela sistem bilong wok lidasip. Tasol PNG nogat.

Bikos long mani na pawa. Lukim, PNG. Ikonomi i bagarap, dilivarim sevis i no stret, pasin stil i go bikipela, sekyuriti bilong kantri i nogut, PNGRC I BAGARAP, judisari sistem bilong yumi i pundaun na pasin bilong harim kot i slo tumas, lo na oda i go nogut na nau yumi lukim, na pilim, ol kikkbek bilong ol dispela asua ol yunivesiti sumatin i pait em i no bilong ol.

Em ol asua bilong gavman na ol sumatin bungim hevi na lusim laip wantaim.

Tru, tumas ol sumatin i pait long kantri bilong yumi tasol yumi aipas na yau pas yet.

I gutpela sapos, minista bilong polis, haia edukesen minista na minista bilong jastis i risain. Dispela tripela ministri o dipatmen bilong ol i gat asua.

Sapos nogat, orait praim minista, namba tu bilong em na olgeta ol edvaisa i mas risain o palamen i mas pinis na go long fres ileksen.

UK Brexit vot inap bungim Ireland wantaim ol Katolik

STAT yet long las wik taim Yunaitet Kingdom (UK) o Gret Briten o Inglan i wokim vot na win long lusim Yuropien Yunien (EU), planti toktok i kamap long ol senis we dispela i kamapim long wol, EU na kantri tu.

Nau ol memba bilong Protesten Yunien long Belfast i wok long sanap long ol longpela lain long kisim ol paspot bilong Noten Ireland, ples bilong ol Katolik lain. Tu, ol Katolik husat i no save opim maus i wok long kempen long Ireland i mas bung na kamap wanpela, ol ripot i tok.

Dispela em i bikipela samting long provins insait long UK we ol bikipela hevi i kamap na stap long en.

Em i 18 krismas bihain nau long tupela sait- Ka-



Pis wol i seperetim ol Protesten na Katolik neiba long Belfast, Noten Ireland. *Poto: ABC*

tolik na Protesten- i bin sainim pis agrimen na pinisim pait egensim ol yet.

Bipo long Brexit vot, planti ol nesenelis Katolik i laikim bai Ireland i mas bung. Na planti Protesten Yunien lain i laik stap yet wantaim UK, tasol bihin long vot, tupela sait long Noten Ireland i wok long gat ol narakain tingting we ol i

no bin ting olsem bai kamap.

Noten Ireland olsem neiba Scotland i bin vot long stap bek wantaim EU, wantaim mak long 56 pe sen i vot long stap bek wantaim EU, maski planti pipel long Gret Briten i bin sapotim vot long bruk lusim EU.

“Mi bin wanpela liklik yunienis, tasol mi ken tok tru olsem mi no

inap vot long Noten Ireland i stap memba bilong UK,” Christopher Woodhouse, husat i gat 25 krismas na i bilong Belfast, i tok.

Em i tok moa olsem tingting long Ireland i yunait, moa long ikonomik sait i strong nau.

Planti yia, planti pipel long Noten Ireland, planti Katolik na ol Protesten tu, i wanbel long stap olsem hap bilong UK bikos dispela i mekim ol i stap gut long sindaun na wok mani, tasol nau UK i vot long lusim EU, na Scotland bai bruk lusim UK.

Ol ripot i tok, Brexit referendam i kamapim nupela namel graun long tupela lotu komyniti husat i pret olsem bruk lusim EU i no gutpela long sait bilong

ikonomi bilong ol na UK.

Lida bilong Greens Pati long Noten Ireland, Steven Agnew, i tok long namba wan taim long laip bilong ol nau, ol pipel i wok long tok olsem ol bai vot long yunaitet Ireland.

Tupela Ireland na Briten i memba bilong EU i bin bikipela samting long kamapim agrimen long 1998 we i bin stopim pait sapos 6-pela kantri we lotu bilong ol i Protesten long not na is Ireland i stap wantaim Briten o Ireland.

Lo bilong EU i promisim fri tred na wokabaut, larim ol Britis o Irish sitisen long wok, kisim ol benefit na kisim marasin o lukim dokta long ol EU kantri, yusim ol paspot bilong tupela kantri wantaim no gat hevi o wari.

ECPNG sios i holim kopret tenksgiving kaikai

EVANGELICAL Church ov Papua Niugini (ECPNG) i holim wanpela kopret tenksgiving fanresing kaikai long dispela wik Trinde long Gateway Hotel long Pot Mosbi.

Presiden bilong ECPNG Sios, Reveren Hengbe Himugu, i tok as bilong kamapim dispela tenksgiving kaikai em long makim 50 yia bilong ECPNG sios long PNG.

Reveren Himugu i tok insait long dispela 50 yia, ECPNG Sios i bin kamap olsem wanpela patna bilong gavman na i givim helt na edukesen sevis long sampela ol ples insait long kantri we gavma sevis i no save go long en.

Dispela kopret tenksgiving dina bai lukim sampela ol pastaim misineri manmeri i givim toktok long namba wan wok

ECPNG sios i save mekim long PNG.

Ol patna bilong ECPNG Sios em ol Misin Aviesen Felosip (MAF balus kampani), Kristen Redio Misin Felosip (CRMF), Kristen Lidas Trening Kolis (CLTC), PNG Bible Society, Sama Instituit ov Linguistik (SIL), Baibel Translesen Asosiesen (BTA), na olgeta Kristen sios.

Ol patna bilong ECPNG sios long edukesen na helt sevis em ol, Nesenel Gavman, Hela Provinsal Gavman, Sauten Hailans Provinsal Gavman, Westen Provinsal Gavman, Ok Tedi Maining Limited, Oil Search Limited, YWAM, na planti arapela bisnis haus.

Ol sapota bilong gutpela wok ECPNG Sios i save mekim em ol, Curtain Bros, Mineral Risos Divil-

opme Kampani (MRDC), Petroleum Risos Moran, Petroleum Risos Gobe, Petroleum Risos Kutubu, Hides Gas Developmen Kampani (HGDC), Hides Spesel Pepes Atoriti (HSPA), Trasn Wonderland, na arapela ol kampani.

Mista Himugu i tok ECPNG sios i laikim ol manmeri husat i bin kisim sevis long edukesen na helt sevis bilong ECPNG long kam lukim dispela kaikai, na sapotim dispela sios long mekim moa wok long senisim laip bilong ol manmeri.

ECPNG Sios em i strong tumas long Westen, Hela na Sauten Hailans Provins. Em i wok long kirapim ol nupela sios long Enga, Westen Hailans, Madang, Morobe, Pot Mosbi, Wes Sepik, na Is Nu Briten.

Em i gat patnasip agrimen wantaim wanpela sios bilong Wes Papua long Indonesia.

Hetkwata bilong ECPNG sios i stap long Halongali long Tari, Hela Provins.

ECPNG Sios em i sios bilong pastaim Gavana bilong Hela, Anderson Agiru, na Memba bilong Koroba Lake Kapiago, Philip Undialu.

Papa bilong Mista Agiru na Mista Undialu em tupela pasta bilong ECPNG sios.


Westen Gavana Ati Wobiro em i wanpela strongpela sios memba bilong ECPNG. Haus lotu bilong Gavana Wobiro long Pot Mosbi em i Gerehu ECPNG Sios.

Maski em i Gavana bilong Westen, Mista Wobiro i save sanap long pulpit na autim Tok bilong God.



Pinis wok nau – Sampela mama bilong St Peter Chanel Peris, Erima long NCD i sanap wantaim Mama Mary Taita Erico (namel) long taim bilong tenks giving Misa long Sarere 28 Jun. Mama Erico i bin winim 46 yia long mekim ol wok bilong sios na em i ritaia nau. *Lukim stori bilong dispela spesel mama long neks wik.*

Trupela lida i mas go pas na soim rot...



Jada 0161

vesiti na dispela studen i dai. Mo-beta ol lida i mas skelim pasin bilong ol studen bilong ol na mekim strongpela toktok egensim pasin bilong pait na strongim ol long soim rispek long laip bilong narapela studen na propeti bilong gavman.

Lida tru, bai luksave long asua

na helpim long stopim birua pasin. Ol toktok ol i tormoi bai soim sapos ol i fit lida tru o nogat.

Dispela stori em i wanpela eksampel tasol long skelim ol lida long politiks, ol studen lida na ol arapela lida insait long komyuniti tu.

Planti taim yumi lusim ting long

pasin bilong sarap, stap isi, skelim gut ol toktok pastaim na bihain yumi opim maus. Ol toktok ol lida i mekim i mas soim olsem ol i no wansait, ol i stap namel na i redi long givim han na stretim wanem hevi i kamap. I luk olsem dispela gutpela pasin tu i no save kamap ples klia moa.

I gat planti as bilong tok i stap. Planti taim ol lida i save tingim laip o wok bilong ol.

Ol i pilim olsem i no seif long salensim husat lain i kamapim hevi. Sampela i pret nogut gavman i rausim ol long wok o i no inap long givim mani long helpim ilektoret o provins bilong ol.

Tude long PNG, yumi gat Oposisen tasol ol i no gat namba. Na long sait bilong Gavman, ol i gat moa memba tasol planti ol memba i save pasim maus tasol.

Na long ol komyuniti tu, i gat sampela lida hisat i mekim gutpela wok long lukautim lo na oda na kamapim gutpela sindaun.

I gat ol lida husat i wok long redi nau long 2017 ileksen na ol i raun na givim presen long ol pipel long kisim sapot na soim pes.

Ol pipel tu i mas skelim gut bikos planti taim, mani bilong baim ol dispela samting em i no pravit mani bilong ol lida, em i mani nesenel gavman i bin givim long baset bilong developim wan wan ilektoret.

I gat planti salens i kamap long PNG long dispela taim. Pasin bilong winim ol dispela salens i no isi.

Wanpela man o wanpela meri tasol i no inap. Sapos yumi olgeta i wanbel na wok bung, ating bai yumi inap.

Gutpela taim o taim nogut, yumi mas wok bung. Yumi mekim olsem bai yumi soim olsem yumi i fit lida long stretim ol hevi long komyuniti na kamapim gutpela sindaun na bel isi.

Pasin bilong wet bai gat gutpela kaikai

NAU long kompyuta na teknoloji taim (age), pasin bilong wet o long Inglis ol i tok patience, i no gat mining moa long laip bilong planti manmeri.

Ol i tok, sapos ol i wet, bai narapela i kisim samting na yu nogat.

Kain luksave long sampela wei i tru, tasol sampela manmeri i tok em i soim amamas bilong sotpela taim tasol.

Sapos yu wet o yu kisim taim long laip long mekim o kisim samting, bai i gat kaikai bilong em tu.

Long taim yu wet long kisim kaikai bilong yu na kaikai, long kisim spes long bus long hap yu laik go long en, yusim mani bilong yu o wet long winim ileksen na



go insait long palamen, bai ol dispela samting samting i gat gutpela kaikai long bihain taim. Long tok Inglis ol i tok ol i gat blessing.

Long wanpela stadi o wok painim, ol saveman bilong Stanford Yunivesiti long Amerika i mekim long 1968 namel long ol elementeri prep sumatin, ol i painim planti kain samting i kamap bilong sindaun bilong ol pikinini long bihain taim.

Long dispela eksesa, ol

saveman i givim soklet (chocolate) long ol mangi. Ol i givim soklet long ol pikinini pinis na ol i wet liklik na bihain ol i givim ol soklet gen long ol pikinini.

Ol i laik painimaut husat bai kaikai soklet bilong em hariap.

Sampela ol mangi i no kaikai soklet bilong ol hariap inap long namba tu taim ol i kisim soklet.

Tasol ol i no tokim ol pikinini olsem bai ol i givim soklet tupela taim.

Bihain long dispela traim, ol saveman i bihainim laip bilong ol pikinini long mak ol i kisim long skul na wei ol i mekim ol samting inap long sindaun bilong ol taim ol kamap bikpela manmeri.

Ol i painim olsem ol sumatin husat i bin wet long

kaikai soklet, em planti bilong ol i stap gut long laip long bihain taim, abrusim long ol sumatin husat i hariap long kaikai soklet bilong ol.

Ol saveman i painim olsem ol sumatin husat i wet long kaikai soklet, i save kisim ol wok we pe i gutpela, ol i no gat plati hevi long laip na long komyuniti.

Bihain long dispela wok painim na narapela ol wok painim ol i bin mekim, ol saveman i tok sapos yu wet long mekim o kisim samting long laip, bai i gat blesing long em.

Yumi olgeta i gat stori bilong yumi long wet. Sapos yumi yusim dispela ol ekspiriens, Skelim Tingting i bilip laip bai i no inap hat long planti taim long sindaun bilong yumi.

Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Demas Saul i holim feveret bes gita long raithan na Robert Kig Junia i pairapim dram.



Ol manmeri bilong Madang amamas long lukim fri open konset.



Ol poto James G. Kila

Demas Saul tokaut long sikret bilong ‘Pulim Pis’

James G. Kila i raitim

BIKNEM musikman bilong Madang, Demas Saul i tokaut stret long pablik las wik Fraide olsem dispela naispela singsing em bin singim em kolim ‘Pulim Pis’ em Membra bilong Madang na Minista bilong Trensport na Infrastraksa, Nixon Duban, i raitim.

‘Pulim Pis’ em naispela singsing we planti manmeri long PNG i save laikim long wanem em i gat naispela stori long en bikos em i stori long pasin stret bilong ol liklik man long ples i go painim pis, na pasin bilong asples nambis lain bilong PNG stret.

Singsing ya ‘Pulim Pis’ long las ya i bin mekim gut tru long PNG musik Top 20 progrem na i bin stap antap

namba wan long planti wik tru.

Demas i tokaut long dispela taim em yet wantaim Vok Kiatik bilong Shydeez ben na grup bilong ol wantaim Sharzy bilong Solomon Ailan i pilai long stes long Madang taun long amamasim nupela Madang taun maket i op.

Bihain tasol long Demas i tokaut long stori bilong song, em wantaim grup bilong em i pairapim stret singsing ‘Pulim Pis’ na mekim spesel dedikesin i go long Membra bilong Tewae-Siassi na Minista bilong Fiseris na Marin Risoses, Mao Zeming. Mista Zeming i bin go long Madang na em wantaim Embaseda bilong Japan long PNG, Morio Matsumoto i bin opim nupela Madang taun maket.

Minista Duban i bin stap long givim toktok long taim bilong opim maket i amamas na smail tasol taim Demas wantaim grup bilong em i pairapim ‘Pulim Pis’.

Planti tausen manmeri i bin sanap long harim ben i pilai i singaut na amamas na i no westim taim long sakim sakim bodi i go kam na danis taim ben i pilai.

Wanpela samting we i pulim planti yangpela manmeri long go bung na raunim stret stes we Demas wantaim grup bilong em na Solomon Ailan musik man Sharzy. Bagaros ya i stap long Madang na i pilai wantaim Demas na long dispela taim em tu, i stap long stes long singim ol song bilong em.

Feveret song ol yangpela man-



Sharzy long lephan wantaim Demas Saul na Vok Kiatik bilong Shydeez.

meri i singaut na askim long pilaim em ‘Bilas bilum bilong Wosera’

Dispela fri pablik konset long las wik Fraide i gutpela sans stret we pablik i lukim Demas na Sharzy i bungim nek na pairapim ‘Bilas bilum bilong Wosera’.

Ol sampela lain manmeri bilong arapela provins olsem ol brata susa bilong Hailens i amamas tru long lukim Demas na Sharzy, na wanpela singsing grup bilong Hailans tu i lukim ol memba bilong grup i lusim grup na kilim skin long danis wantaim tumbuna bilas bilong ol.

Wanpela kaukau sela bilong


Henganofi long Isten Hailens, Steven Nenefu i tok “Mi no prèt long bikpela hot san, mi laik lukim stret Sharzy na Demas na mi givim K10 long wanpela mama bilong Bugati long was long kaukau bilong mi na mi go sanap na lukim ben pilai” Nenefu i tok.

Em i tokaut olsem tru tumas ol boi Madang em ol trupela lain long pilai laiv stret na pairap bilong musik em kik stret na em amamas tru long harim na boi no westim...em sanap na givim Sepik disko stail stret taim Sharzy na Demas pairapim ‘Bilas bilum bilong Wosera’.

Ol singsing grup bilong Hailans danis long musik bilong Demas na Sharzy.



Em nau! Ol pikinini i ken painim rot i go long ples wantaim Wantok lain...



PAINIM WOD PILAI

<i>Ol wod lista:</i>	GLASMAN	LEPHAN	ROKROK
	HARIAPIM	MANGANG	SKRAPIM
ASASAIT	INAPIM	MILISIM	STAMAN
BASKET	KALOP	NETIF	TANGET
BLAKBOKIS	KIVUNG	NUPELA	TAMBIRUA
DIDIMAN	KRIFEL	PAIRAP	WASWAS
FOPELA	LESON	POROMANIM	YUMI

Q E R M S P F G L T A I L I S U I Q N U P W O W E
Z Z N O A I E L R A A F T A D A N Z H E X E T R H
P T L R S T A M A N H L D N I L A K V D E J C E W
I B N H L X H S S U A A Y V D S P Y B F L P C H I
S R S D T B E G U P J S R U I H I N P L D W A H R
G D P L Q A R S I E Q T I I M K M C W E N T B F F
F O N N G S I F A L I E Y B A I I Z T P I D R E S
G Z N N E K L S X A J E A L N P L V R H N U T T R
T H A E X E D M S T C D T A M B I R U A G G L D R
Q P C T F T D A V K A N M K E F S M I N R E F H A
K U R I O W S O M J R O P B T Y I N A R G A W G D
E A R F P A M L R N R A C O L T M G E E F P R A S
F K N P E S C R I O N E P K M T N O E R I U O Y N
K F E H L W P B P H K P A I R A P I T E S M E A E
E J O E A A I T A A E R S S M N T D B U S J D N E
L Z P W A S T X L R N K O S X G B F N Z D T Z T T
E A W O E I P B N E G A A K E E S H E J G I T I H
I O E T F N T Y E S S L O E M T O P C E M Z N E S
J G F W A D D P H N G O X L W P E O I G A T Q S S
G T S A T T E O S D G P N H I H P E A D E H C R B

STORI BILONG TUMBUNA

WAPO KLAUT I PAIRAP

Wanpela taim wanpela sot-pela strongpela man i stap. Em i tingting long go long bus long painim abus. Em i go raun long planti hap bilong bus na bihain em tait na hangre.

Em i sindaun malolo na kaikai kaukau bilong em, wantu wanpela man i gat longpela gras i kam na i laik kilim em. Tupela i pait nogut tru. Dispela strongpela man i paitim man i gat longpela gras na em man i gat longpela gras i tok, “Pinis, inap pinis, brata bilong mi! Yu kam wantaim mi.”

Na tupela wantaim i go antap long wanpela maunten i sanap stret tru. Antap long dispela maunten i gat wanpela liklik haus i nais tumas. Dispela haus i narakain tru na em i bilong dispela man i gat longpela gras. Long arere long dispela haus i gat wanpela naispela liklik gaden i stap. Bihain dispela man bilong bus i tok: “Nau long dispela de yu no kisim abus long wanem mi no bin laik.” Na i tokim em: “Yu putim het bilong yu i go daun long taim mi go insait.”

Na sotpela man i mekim olsem man bilong bus i stap ausait na em i mekim sampela kain tok bokis na bihain em i tokim arapela man long lukluk antap. Sotpela man i lukluk antap na em i lukim planti ol kain kain gutpela abus i stap. Busman i givim sotpela man wanpela banara i gat pawa wantaim wanpela pik na ol sampela arapela kain samting pinis na i tokim em olsem: “Nau yu ken go long ples bilong yu. Tasol yu no ken larim brata bilong yu long lukim banara bilong yu. Yu mas sut long dispela ba-

nara long taim yu go long pait wantaim arapela man. Kilim dispela pik na kukim hat bilong em long givim gutpela smel long mi. Na yu no ken kaikai dispela hat bilong pik.” Em i givim wanpela kain lip long em na i tokim em: “Em dispela lip yu mas planim long dua bilong nupela haus bilong yu.” Em sotpela man i go long ples bilong em na i no long taim i bin i gat wanpela bikpela pait i bin kamap. Sotpela man i kisim banara bilong em na i go long dispela pait. Em i pait na kilim planti man moa. Klostu em i pinisim olgeta. Ol arapela man long sait bilong em i lukim dispela na ol i tingting planti. “Em dispela man i kisim banara we?” ol i tok.

Wanpela de liklik brata bilong em i hait i go na i stilim banara bilong em. Bihain man bilong banara bilong em tasol banara i no i stap. Bel bilong em i hat nogut tru long wanem em i save i no gat arapela man, em brata bilong em tasol i kisim. Em i kirap i go na pait wantaim em. Bihain long pait liklik i ranawe i go long arapela hap. Tulait long moning taim, sotpela man i kilim pik busman i givim em. Em i katim hat bilong em kisim i go long Haus Tambaran. Taim em i kukim dispela hat long givim ofa long busman, em i lukim wanpela liklik pisin i flai i kam i sindaun long Haus Tambaran. Em dispela busman i tewel bilong papa tru bilong em bin dai bipo. Taim tupela brata i bin pait i bin i gat bikpela klaut i pairap. Olsem tasol taim mipela i harim klaut pairap, mipela i save em tupela brata pait gen.

Kurun J. Abegul Madang

Ansa bilong Wod Pilai isu 2181



Narapela kampani i laik baim InterOil

INTEROIL Corp i tok narapela kampani i laik baim 100 pesen sea bilong em na i kam askim ol.

Taim Oil Search Limited i laik baim InterOil wantaim biknem PRL 15 ges fil bilong em wantaim K7 bilien, narapela kampani tu i laik baim InterOil na i askim ol bod na menesmen bilong InterOil.

InterOil i tokaut olsem em i kisim pinis wanpela pas i kam long wanpela kampani husat i laik baim 100 pesen sea bilong em.

InterOil i no tokaut long nem bilong dispela kampani, husat i laik baim 100 pesen sea bilong em.

Long mun Me, Oil Search i laik baim 100 pesen sea bilong InterOil na tupela kampani i sainim agrimen pinis long larim dispela bikpela bisnis trenseksen i kamap.

Aninit long dispela agrimen, Oil Search i laik givim K7 bilien long InterOil na baim dispela kampani.

Tasol taim dispela nara-

pela kampani i laik InterOil, Oil Search i larim InterOil i toktok wantaim dispela kampani.

InterOil i tok em i wok long toktok wantaim ol loya na fainensal edvaisa long lukluk na skelim dispela ofa i kam long dispela nupela kampani.

Ol bod ov dairekta bilong InterOil i les long toktok moa long dispela toktok bikos ol i sainim wanpela agrimen pinis wantaim Oil Search long Me 20 long larim Oil Search i baim InterOil.

Bod ov dairekta bilong InterOil i wok long tokim ol seaholda bilong InterOil long larim Oil Search i kisim InterOil.

Long Julai 28, ol seaholda bilong InterOil bai bung long wanpela spesel bung long vot na wanbel long larim Oil Search i tekova long InterOil.

Pastaim Siaman na Sif Eksekutiv Opisa (CEO) bilong InterOil, Phil Mulacek, i bin

laik long stopim dispela spesel miting, na tu stopim Oil Search long baim InterOil tasol em i bin lus long kot.

Suprim Kot bilong Yukon long Kenada i bin tokim InterOil long bungim ol seaholda bilong em na ol yet bai skelim sapos ol i laikim ol i les long salim kampani.

Mista Mulacek i bin lus

long dispela kot. Mista Mulacek i tok veliu bilong ges risev i stap long PRL 15 em i no inapim K7 bilien.

Em i tok ol seaholda bilong InterOil bai lusim bikpela sans long mekim mani bikos o bod i feilim ol seaholda gut tru.

Tasol kot i no luksave long toktok bilong Mulacek.



Ges i paia long taim bilong flo tes long Antelope 2 wel long PRL 15.

Petromin senisim nem

WANPELA namba wan oil, gas na mineral kampani bilong gavman, Petromin PNG Holdings Limited, i senisim nem bilong em long las wik Fraide.

Nupela nem bilong Petromin em i Kumul Mineral Holdings Limited (KMHL).

Menesing Dairekta bilong Petromin, Thomas Abe, i tok KMHL bai menesim olgeta bisnis na invesmen bilong gavman long mineral na maining indastri.

Dispela senis i kamap bihain long gavman i bin kamapim wanpela lo long las yia long stretim gen ol straksa bilong ol bisnis na invesmen bilong gavman long maining na petroleum indastri.

"Gavman i bin kamapim wanpela nupela lo ol i kolim Kumul Minerals Act long mun Me long las yia. Dispela lo i larim Petromin i senisim nem i kamap Kumul Mineral Holdings Limited," Mista Abe i tok.

Mista Abe i tok dispela nupela kampani bai kisim ples bilong Petromin na em bai lukautim olgeta maining bisnis bilong gavman.

Kumul Petroleum Holdings Limited (KPHL) em i narapela kampani bilong gavman long lukautim na menesim olgeta oil na ges bisnis na invesmen bilong gavman.

Petromin i gat sampela ol sea long maining na oil na ges bisnis wantaim. Ol ges na oil bisnis na invesmen bilong Petromin bai nau go long Kumul Petroleum.

Menesing Dairekta bilong Kumul Petroleum, Wapu Sonk, i tok sampela ol invesmen bilong Petromin long Kutubu na PNG LNG Projek bai nau kam aninit long Kumul Petroleum.

"Wanpela sabsideri kampani bilong Petromin ol i kolim Eda Oil i gat sampela intres long Kutubu. Narapela ol i kolim Eda LNG i gat 0.2 pesen seaholding insait long PNG LNG Projek," Mista Sonk i tok.

Em i tok ol bai muvim dispela ol invesmen bilong Petromin i go long Kumul Petroleum, na larim Kumul Petroleum i lukautim dispela bisnis bilong gavman.

Deputi Siaman bilong BSP risain

DEPUTI Siaman bilong Bank South Pacific (BSP), Tom Fox, i risain long wok bilong em olsem dairekta bilong benk.

Mista Fox em i wanpela long taim dairekta bilong BSP we em i bin stap moa long 23 yia olsem dairekta bilong dispela biknem benk bilong Saut Pasifik.

Bod Siaman Sir Kostas Constantinou i tok olsem Mista Fox i risain taim em i laik tok-save long maket ripot.

Sir Kostas i tok bod bilong BSP i tok tenkyu long ol sevis em bin givim long benk insait long dispela 23 yia we em i bin stap olsem dairekta.

Em i tok bod i wanbel long em i lusim wok na ol i wanbel long larim em i risain na malolo.

Sir Kostas i tok Mista Fox i

bin wok olsem dairekta bilong BSP taim em i bin stat olsem wanpela benk bilong PNG yet, we ol bisnis man bilong PNG i bin baim na tekova long Nesenel Benk ov Australia long yia 1993.

Long yia 2002 taim BSP i bin baim PNG Banking Corporation (PNGBC) i kam inap nau, Mista Fox i bin wok olsem wanpela dairekta bilong benk.

"Mista Fox i bin mekim planti gutpela samting long kirapim BSP na larim benk ya i kamap wanpela biknem benk insait long Pasifik.

Sir Kostas i makim maus bilong ol seaholda na dairekta bilong BSP na tok tenkyu long Mista Fox i bin stap wantaim benk na mekim planti gutpela samting long kirapim dispela benk.

TRANSPOT kampani bilong PNG, Mapai Transport Limited, i opim nupela opis long Nu Silan bikos sans bilong ol long mekim bisnis long PNG em i no gat moa.

Menesing Dairekta bilong Mapai Transport, Jacob Luke, i tok sans bilong mekim bisnis long PNG long sait bilong transpot indastri em i pinis.

Mista Luke i mekim dispela toktok taim em i laik kli-aim tingting bilong manmeri long as tru bilong Mapai i opim nupela opis long Auckland, Nu Silan.

"Sans bilong mekim bisnis long lojistiks na transpot indastri long PNG em i no gat moa. Mipela i skelim olsem PNG no gat gutpela maket long mipela i resis na mekim mani.

Mapai Transport i go aut ovasis

"Sans bilong mipela long mekim mani i pinis. Long dispela as mipela i opim nupela opis long Nu Silan na traim painim sampela ol sans long mekim bisnis long hap," Mista Luke i tok.

Em i tok narapela as long ol i go aut long ovasis em long groim bisnis na mekim

kampani i go bikpela.

"Narapela as long em lukluk gut na kamapim bisnis i go bikpela. Mapai i wok long gro na gro bilong em i mekim em yet i opim nupela opis long Nu Silan.

"Mipela i laik go opim sampela moa nupela opis long arapela ol kantri long



bihain taim," Mista Luke i tok.

Mista Luke i tok em i no wari long dispela disisen ol i mekim long statim nupela opis long Nu Silan.

"Em i wanpela gutpela disisen mipela i mekim long statim nupela opis. Dispela bai givim sans long planti ol manmeri PNG i wok wantaim Mapai long Nu Silan," Mista Luke i tok.

Em i tok ol manmeri PNG husat i fit long wok long Nu Silan bai gat sans long wok wantaim Mapai long Nu Silan na kisim sampela moa nupela save long stendat bilong ol.

Bikpela haiwe kar bilong Mapai Transport i ran long Hailans Haiwe.



**Buy Your Air Niugini Ticket
Anywhere, Anytime
Using BSP Mobile Banking.**



Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.



Air Niugini
www.airniugini.com.pg



Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicebsp@bsp.com.pg www.bsp.com.pg

Japan gavman na pipel givim nupela maket long Madang

James G. Kila i raitim

PLANTI tausen manmeri i bin bung namel long Madang taun long Fraide, July 1 long lukim komisining o ofisal lonsing bilong nupela Madang taun maket.

Kain kain kala bilong ol tum-buna singsing grup wantaim bilas na pairap bilong laiv ben tu i wokim ples i muv stret long dispela taim

Embesesa bilong Japan, Morio Matsumoto wantaim Minista bilong Fiseris na Marin Risoses, Mao Zeming i bin katim rop long launsim dispela bikpela projek.

Deputi praim minista na Minista bilong Intenol Rilesins, Gren Sif Se Leo Dion i makim Praim Minista Peter O'Neill na Nesenel Eksekutiv Kaunsil (NEC) long givim bikpela tok tenkyu i go long gavman na pipel bilong Japan long dispela nupela maket.

Se Leo i givim tok amamas bilong em tu long gavman bilong

“Dispela nupela Madang taun maket em bikpela samting stret we i ken givim moa helpim i go long ekonomi bilong Madang”

Japan na pipel bilong Japan makim 7.5 milien pipel bilong PNG na moa long faiv hundred tausen pipel bilong Madang provins.

Em i givim tok amamas bilong em tu long Japan Intanesenel Koporesin Ejensi (JICA) na bilding kontrakta Dai Nippon bilong Japan long wokim plen long kamapim dispela naispela maket wantaim gutpela lukluk bilong en na ol failiti em i gat.

Dispela nupela Madang taun maket em bikpela samting stret we i ken givim moa helpim i go long ekonomi bilong Madang na moa long en em helpim i go long ol liklik manmeri olsem ol mama long ples na ol rurel famas long salim ol fres gaden kaikai bilong ol long kisim mani na helpim sindaun insait long famili, komyuniti na sosaiti bilong ol.

Se Leo i tok olsem dispela nu-

Embesesa bilong Japan, Morio Matsumoto wantaim Minista bilong Fiseris na Marin Risoses, Mao Zeming i katim ribbon long opim dua bilong nupela maket.



Planti tausen pipel bung long lukim nupela maket i op.

Ol bikman raun lukim insait bilong nupela maket.

Ol Poto: James G. Kila



Embesesa bilong Japan, Morio Matsumoto i mekim sampela toktok na opim maket.



Madang eben LLG wod 2 lida Christopher Tomongo wantaim komyuniti givim presen long ol lan bilong Japan



pela maket fasiliti i go stret wan-taim wok-plen bilong Nesenel Gavman long strongim wok long ekonomik developmen, na em i givim bikpela tok tenkyu stret i go long gavman bilong Japan long sapot ol i givim long kostal fiseris sekta long PNG.

Dispela nupela Madang taun maket na kostal fiseris maket em gavman bilong Japan aninit long JICA i givim mani helpim na sapot tu i bin kam long gavman bilong PNG aninit long Nesenel Fiseris Atoriti (NFA) long wokim kamap.

Deputi praim minista, Se Leo Dion i tok dispela nupela Madang taun maket em gutpela invesmen tru long Madang provins na taun na olget lain i mas lukautim gut.

Deputi PM, Se Leo Dion imekim bikpela toktok i go long ol lain olsem Madang provinsal gavman, Madang provinsal ed-ministresin wantaim tu Madang eben LLG na Madang Distrik Developmen Atoriti, DDA, long wok bung wantaim na mekim gutpela yus long dispela maket long sevim ol pipel long provins.

Memba bilong Madang na Minista bilong Trensport na Infrastraksa, Nixon Duban i wokim bikpela toktok na i salensim ol lain long atoriti long lukautim nupela Madang taun maket olsem ol i mas givim luksave i go long lain asples pipel bilong Bel.

Gavana bilong Madang, Jim Kas tu i givim toktok bilong em na givim bikpela tok tenkyu i go long gavman na pipel bilong Japan long dispela naispela na stail maket we i stap namel tru long Madang taun.

Embeseda bilong Japan, Mista Matsumoto i tok olsem em i gat bikpela bilip olsem dispela nupela Madang taun maket bai stap olsem bikpela hanmak na gutpela kala long soim ol arapela pipel i go raun long Madang.

Mista Matsumoto i tok olsem mani bilong wokim kamap dispela nupela Madang taun maket i kam long poket mani bilong ol pipel bilong Japan stret.

“Mani long wokim dispela nupela maket i kam long poket mani na seivings bilong ol pipel bilong Japan stret.

“Olsem na taim yupela yusim, yupela mas oltaim tingim spirit bilong ol pipel bilong Japan long sait long pasin poroman na wok-bung. Dispela bai strongim poroman pasin moa namel long PNG na Japan,” Mista Matsumoto i tok.

Cowboys i daunim Rabbitohs

NORTH Queensland Cowboys i daunim South Sydney Rabbitohs, 20-0, long Barlow Park pilai graun long Cairns.

Ol Rabbitohs i pilai strong egensim ol NRL wina bilong las yia long ai bilong planti lain tasol ol Cowboys i no givim wanpela sans long ol boi Sydney long kisim wanpela skoa.

Namba wan pilaia bilong Kwinslan Stet ov Orijin,

Johnathan Thurston, i bin putim wanpela trai. Bihain narapela trai i bin kamap gen we em i salim bal i go long pilaia husat i bin putim trai na dispela trai i kamap.

Ol Rabbitohs i no win liklik na ol i painim hat tru long go insait long ol fainel bilong 2016 NRL resis.

James Tamou na Matt Scott i go pas long ol fowad bilong ol Cowboys na i

brukim banis bilong ol Rabbitohs we tupela i mekim rot bilong Thurston na ol poro pilaia long bagarapim tingting bilong John Suttons bilong amamasim 250 gem bilong em.

Greg Inglis, Luke Keary na Sam Burgess i bin traim hat long sait bilong ol Rabbitohs, tasol ol i painim hat tru long brukim banis bilong ol Cowboys.

Pilai i bin stat strong long namba wan hap bilong resis tasol ol Cowboys i bin painim rot long kisim, 14-0, poin we Thurston na Scott i putim trai bipo long taim bilong malolo i kamap.

Cowboys i bin putim namba tri trai klostu long taim ol i bin statim namba tu hap bilong resis na rausim ol Rabbitohs husat i no gat wanpela skoa.



Justin O'Neill i takolim Greg Inglis.

Trai bilong Rapana i gat moa pawa

JORDAN Rapana bilong ol Canberra Raiders i bin putim wanpela stail trai i mekim ol Raiders i win, 29-15, egensim ol Newcastle Knights long asples bilong ol Raiders, Canberra.

Newcastle i stap pas long namba wan hap bilong resis wantaim 20-0 tasol ol Raiders i kisim strong long asples bilong ol na ol i stap pas gen long namba tu hap wantaim 25-24.

Ol Knights i les long ol Raiders

bai winim gen wantaim wanpela poin na Trent Hodkinson i bungim skoa bilong ol, 25-25, long 80 minit bilong resis taim na skruim resis i go insait long ekstra taim.

Tupela tim wantaim i traim hat long kisim fil gol long golden taim. Taim resis i go het, Winga bilong ol Raiders, Rapana, i abrusim tupela pilaia bilong ol Knights na i putim wanpela trai long sait lain i mekim ol kamap wina.

“Mi tokim ol boi bilong mi

olsem i gat wankain sans i bin stap taim mipela i bin pilai egensim ol Dragons long raun namba 10 na ol Panthers long raun namba 9,” Rapana i tok.

“Mi bin bihainim bal long olgeta kik na laki tru long dispela gem, bal i kam long sait bilong mi na mi bin putim dispelas trai.”

Ol Knights i bin pilai gut long namba wan hap, tasol long namba tu hap, ol Raiders i bin soim kala bilong ol gut tru na daunim ol Knights.



Jordan Rapana na ol Raiders i amamas long las trai ol i putim long winim resis long Canberra.

Rio 2016: Bolt i no resis long Olimpik traim resis



Usain Bolt i kisim bagarap long join bilong em.

USAIN Bolt i no ran long nesenel Olimpik traim resis long Jamaika bikos em i bin kisim bagarap long lek join bilong em taim em i resis long 100 mita semi-fainel long Jamaika.

Bolt husat i gat wol rekot long 100 mita resis bai winim 30 krismas long las de bilong Rio Olimpiks resis. Em i winim semi-fainel resis wantaim 10.04 seken we em i bin stat isi na pinisim lain bilong Nesenel Stediam long Kingston gut, bipo long fainel resis i kamap.

“Mi no pilim orait long join bilong mi bihain long namba wan raun na semi-fainel resis. Sif Dokta bilong Nesenel Sempionsip i sekim na i painimaut olsem join bilong mi i bin bruk liklik,” Bolt i tok.

Dokta i tok dispela bruk long join bilong em i Gret 1 na dispela em i liklik bagarap we em bai kisim sampela de o wanpela wik long kamap orait.

Dispela liklik bagarap bai no inap long stopim driman bilong Bolt long winim namba tri Olimpik gol medal long 100 mita resis, 200 mita resis na 4x100 mita resis long Brasil.

Etletik gavaning bodi bilong Jamaika i tok orait long ol etlit long soim ol dokta sapos ol i kisim sampela bagarap na ol bai no inap long resis long ol traim resis i kamap.

“Mi laikim ol dokta long stretim wari bilong mi kwiktaim long soim kala bilong mi long London Aniveseri Gems bai kamap long Julai 22 long kisim ples long go resis long Rio Olimpik Gems,” Bolt i tok.

Bipo wol sempion, Yohan Blake, i winim 100 mita semi fainel resis long mak bilong 9.95 seken, Nickel Ashmeade i kamap namba tu wantaim 10.01 seken na Asafa Powell i kamap namba tri wantaim 10.02 seken.

Bolt i setim wol rekot long 9.58 seken.

Euro 2016: France i winim kwata fainel



Iceland i go aut long Euro 2016 resis, tasol ol pilaia na sapota i amamas long ol i pilai gut.

FRANCE Tim, husat i go pas long Euro 2016 kwata-fainel i daunim ol Iceland, 5-2.

Iceland em i wanpela kantri i gat populesen mak long 320, 000 pipel. Ol i bin kisim wankain poin egensim ol Portugal long grup stej na kisim wankain poin egensim Hungary bipo long ol i daunim Austria long wanpela las minit gol, 2-1, na kwal-ifai long nokaut stej.

Iceland i winim nokaut stej, 2-1 poin, egensim ol England long raun 16 bipo long ol i pilai egensim France.

Tasol, ol Iceland i no strongim banis bilong ol taim ol i bin pilai egensim ol France long kwata-fainel.

France i bin putim tupela gol long namba 19 minit na ol Iceland i strong long rausim France i go aut tasol France i strongim banis bilong ol inap long pinis taim bilong namba wan hap i kamap.

Bipo long taim bilong malolo i kamap, ol i bin putim 4 gol na Iceland i strong yet long painim skoa bilong ol.

Ol Iceland i strong yet long namba tu hap na ol i bin putim

wanpela gol long 11 minit. Tasol, France i strong yet long stap pas wantaim 4-pela gol na ol i bin putim wanpela gol gen long 59 minit na skoa i sanap olsem 5-1.

Taim resis i gat 6-pela minit i stap yet, ol Iceland i bin kisim wanpela gol. Tasol tupela tim wantaim i no bin kisim wanpela poin bihain long namba tu na las gol bilong ol Iceland na ol i bungim pinis taim bilong resis.

Nau, France bai pilai egensim Germany long Semi-fainel long Fraide moning, na Portugal na Wales bai pilai pas.

Williams i amamas long namba 300 Grand Slam win

SERENA Williams i amamas long winim namba 300 resis bilong Grand Slam tenis tonamen long Sande.

Serina i winim 34 krismas na em i winim 82 resis long Wimbledon. Nau em i stap klostu long bungim rekot bilong Steffi Graf husait i bin winim 22 Grand Slam taitel long Open resis.

Tasol, Williams i bin lus taim em i bin pilai egensim wanpela top 40 pilaia long raun 26 long Wimbledon resis.



Serena Williams i stap long Wimbledon.



Madang Provinsal Gavman na RamuNiCo bai wok bung



Grup poto bilong MPG delegesin na Ramu NiCo (MCC) menesmen.



Miting long Ramu NiCo bod-rum las wik Fonde.

GAVANA bilong Madang, Jim Kas i bin go pas long wanpela delegesin o grup husat i bin bung wantaim menesmen bilong Ramu NiCo (MCC) las wik Fonde long pasim toktok long kamapim wok bung namel long Madang provinsal gavman na MCC.

Mista Kas wantaim delegesin bilong em i bin bung wantaim Presiden bilong Ramu NiCo, Wang Jincheng na Vais Presiden Wang Baowen na toktok long traim painim rot long bringim gutpela wok-bung na bringim kamap divelopmen namel long tupela sait wantaim.

Mista Kas yet i tokaut olsem dispela raun bilong em long bungim ol menesmen tim bilong Ramu NiCo (MCC) i kamap tupela de tasol bihain long em i kam bek long Saina. Mista Kas i bin go long Saina wantaim Minista bilong Maining, Byron Chan wantaim ol arapela gavman lida.

Long toktok bilong em wantaim Presiden Wang bilong Ramu NiCo, Mista Kas i tokaut olsem em guria stret na nau em i gat bilip olsem Saina i go pas tru long sait long bisnis na teknoloji divelopmen na em i bilip olsem Madang provins o ken lainim planti samting long

Saina. Olsem na em i tok em laik wok klostu wantaim Ramu NiCo husat em wanpela bikpela invesmen bilong Saina insait long PNG.

Mista Wang i tok welkam long Mista Kas wantaim delegesin bilong em. Deputi gavana bilong Madang, Rama Marisan na fes seketeri bilong Mista Kas, Augustine Dunstan tu i go long Ramu NiCo operesin bes bilong Kampani long Madang taun.

Mista Wang i tok Ramu NiCo i amamas tru long lukim ol lain bikman bilong Madang provinsal gavman long opis bilong ol bikos em namba wan taim kain lain i go long opis bilong ol taim projek i kirap long 2016.

"Dispela em stat bilong long-taim poroman namel long yumi," Mista Wang i tok.

Pastaim long Mista Kas i givim toktok bilong em, Presiden bilong Ramu NiCo, Mista Wang i givim stori long posisen bilong Kampani na i tokklia tu long sait long prodaksen long stat bilong en i kam. Em i tok Kampani i bin statim prodaksen long taim nogut stret bikos wol metal prais i bin daun-bilo tru. Em i tok stat long Projek komisining i kam nau prais i wok long go daun yet.

Tasol, Kampani i bilip olsem wantaim sapot bilong Madang provinsal gavman na ol arapela stekholda bilong Projek, em bai helpim long bringim kamap Projek long gutpela mak klostu taim.


Presiden Wang i tokaut tu long ol lain bilong Madang provinsal gavman olsem long las yia Kampani i bin mekim histori stret taim em i wok i go kamap wantaim prodaksen mak olsem 95 pesen. Dispela wok mak i winim ol arapela wankain nikel maining projek insait long wol. Olsem na Mista Wang i tok olsem Madang gavman i mas amamas olsem kain gutpela divelopmen i stap long maining industri long Madang provins.

"Wantaim gutpela wok-bung mipela i ken yusim Ramu Projek long mekim Madang provins i kamap olsem gutpela ples long wokim bisnis na promotim turis industri tu wantaim," Mista Wang i tok.

Mista Kas long toktok bilong em tu i askim long moa komitmen i kam long Saina long Madang provins bikos em i bilip olsem Saina i gat ansa long bringim gutpela divelopmen i kam long Madang.



Gavana Kas i sanap wantaim Presiden Wang Jincheng long poto.



Sapias i lusim sia bilong PNGRFU presiden



Richard Sapias i toktok long taim em i risain long sia bilong PNGRFU presiden.

PAPUA Niugini Ragbi Futbal Yunion (PNGRFU) presiden, Richard Sapias, i lusim dispela wok bihain long 7-pela yia.

Sapias i tokaut long midia stetmen olsem em i risain olsem hetman bilong Ragbi PNG.

Sapias i bin kisim Osenia Ragbi presiden sia long Epril long dispela yia long taim bilong Anual Jenerel Miting (AGM) long Auckland, Nu Silan, na dispela nupela wok i mekim na em i lusim sia bilong PNGRFU.

Ol i bin makim Sapias tu long rijonal komiti bilong wol ragbi na em i tok olsem han bilong em i pulap long mekim tupela wok wantaim.

“Rot bilong wok i hat tumas taim mi kisim wok na mi ting dispela em i taim bilong ol narapela nupela lain wantaim nupela aidia long putim ragbi i go pas long ol narapela wok bilong ol yet,” Sapias i tok.

“Sampela lain i ken bringim gutpela rekot long go pas long ol bikpela wok olsem dispela kain namba wan posisen.”

Sapias i tok olsem i gat planti wok long mekim, tasol mani i sot.

“I no gat wanpela hat bilong stretim dispela hevi kwiktai, tasol mi strongim olsem ol ful-taim wokman bilong ragbi i save mekim namba wan wok wantaim liklik mani,” Sapias i tok.

Taim askim i go long em long program bilong ragbi sevens, em i tok olsem taim yu lukluk long ol narapela kantri i yusim mani long kamapim ol pilaia, kantri bilong yumi bai no inap long mekim olsem bikos ragbi sevens program mani bilong yumi em i no inap.

“Trutru mipela i mekim wantaim liklik sapot,” Sapias i tok.

“Yunion i gat bikpela salens na yunion grup i gat inap sans long winim planti mani long wol stej taim ol i wok bung wantaim.”

Lista bilong ol hap bilong winim mani em:

- Bikpela wok bung wantaim long ol ragbi program long namba wan taim ol i bin tokaut long olgeta hap long kantri long yia 2012.
- Taim junia ragbi program i kamap, PNGRFU i lukluk long namba wan kala i kamap long junia ragbi pilai.
- Long yia 2014, PNGRFU i gat bikpela namba bilong junia ragbi program i bin

kamap na ol i bin rekodim insait long Osenia rijon olsem 21000 program.

- Bikpela namba wan samting em planti ol meri i bin stap wantaim long junia ragbi program.
- Long pinis bilong yia 2015, ol i bin pusim PNGRFU i go antap long top 20 kantri long wol aninit long wok bung wantaim grup. Bikpela mak PNG i bin winim egensim ol kantri olsem Samoa, Tonga na Fiji. Namba wan samting long PNGRFU i winim dispela mak em ol bai no inap long lukluk olsem top 20 kantri em i liklik samting bikos ol i save wok bung wantaim na i gat tupela grup wantaim bikpela populesen. PNGRFU i ken resis egensim ol dispela kantri na PNGRFU i ken go pas yet.
- Long yia 2014 i soim olsem 7s tim bilong ol man i bin kisim wanpela sans long pilai long 2015 Hong Kong 7s long namba wan taim bihain long ol i no bin pilai insait long 14 yia. Dispela sans em ol i bin kisim tok orait bihain long 7s tim bilong ol PNG man i daunim Tonga. Ol i bin soim kala bilong ol gen long Hong Kong 2015 na daunim ol.
- Pukpuk 15s i winim Osenia kap long 2015 wantaim nupela het kosa ol i bin makim, Sydney Wesley. Yangpela tim i kamap wantaim ol nupela greduet long anda 20 long yia i go na ol yangpela pilaia ol i save stap long Australia. Dispela tim bai go het long ragbi Wol Kap kwal-ifai resis long yia i kam.
- Ragbi 7s tim bilong ol meri i winim brons long Pasifik Gems i kamap long yia i go, 2015.
- Ol bai sanapim Ragbi Haus na haus bilong PNG Ragbi long Bisini long Pot Mosbi.
- Ol i makim Sapias long Wol Ragbi Kaunsil em i kamap olsem histori aninit long tri nesen.
- Sapias i tok olsem em i het bilong rijonal, em bai toktok long tupela Osenia tim i ken resis long Hong Kong Nesens Kap resis.
- “Dispela em i strongpela resis bilong ol level tu kantri na mi bai mekim wok raun long putim Papua Niugini i go insait long dispela nesens long resis,” Sapias i tok.

Senis bai kamap long IAAF

PRESIDEN bilong Etletik Papua Niugini, Tony Green, i bin go bek long Yunaitet Stet bilong Amerika (USA) long asde na i tok i gat bikpela senis bai kamap long Intenesenel Asosiesen bilong Etletik Federesen (IAAF).

Green i bin go long Amsterdam, Kapital bilong Holan, we em i bin go stap long wanpela bikpela bung i bin kamap inap long tupela de we ol i bin toktok long senisim Intenesenel Asosiesen bilong Etletik Federesen (IAAF) na bai i kamap nupela.

Ol i bin salim pas i kam

long Green wantaim tripela mausman bilong Osenia eria long stap wantaim long dispela bung we ol i toktok long bikpela senis bai kamap long gavanens na operesen bilong IAAF.

Aninit long pawa bilong nupela presiden, Lord Sebastian Ceo, IAAF i go insait long sampela bikpela salens na ol i rausim Russia na tu, i gat bikpela tokwin i raun olsem ol bai no inap long ranim IAAF gut.

Long namba tu mun bilong dispela yia, ol i bin kamapim wanpela wok grup long lukluk long olgeta hap bilong straksa na operesen

bilong IAAF.

Sampela ol mausman bilong kontinental eria i bin toktok long dispela wik long Amsterdam long senisim ol straksa na operesen.

Narapela bikpela hap bilong projek em ol bai tokaut long Oktoba long dispela yia taim presiden na wok grup bain raun na lukim ol kontinental eria long bung wantaim olgeta memba bilong federesen long kisim inap save.

Las toktok em ol bai toktok long Spesel Kongres Bung bilong olgeta memba bilong federesen long Desember, 2016.



Presiden bilong Etletik Papua Niugini, Tony Green, i sanap long han kais wantaim mausman bilong Osenia Eria.

Hunters i stap long namba tri ples

OL SP PNG Hunter i go antap long namba tri ples long lata bilong Intrus Supa Kap resis bihain long ol i bin daunim Tweed Heads Seagulls, 40-10.

Bihain long raun namba 17, Hunters i stap long 24 poin we ol i bin winim 11 gem, lus long 5-pela gem na stap sambai long wanpela gem.

Ol top 6 tim em;

- 1 Burleigh Bears wantaim 27 poin;
- 2 Redcliffe Dolphins wantaim 24 poin;
- 3 SP Hunters wantaim 24 poin;
- 4 Townsville Blackhawks wantaim 23 poin;
- 5 Easts Tigers wantaim 23 poin na;
- 6 Northern Pride wantaim 18 poin.



Bikpela fowod bilong ol Tweed Heads Seagulls i takolim pilai bilong Hunter.

Digicel Kap skul holide program i stat

DIGICEL i go pas long namba wan Digicel Kap Skul Holide Program pilai bilong ol i bin kamap long Nesenel futbol Stediam (NFS) long Pot Mosbi long dispela wik.

Dispela program em i bilong promotim helt na painim gut-pela sindaun namel long ol lokal skul pikinini.

Dispela iven i makim stat bilong dispela skul program long dispela yia.

I gat 195 sumatin insait long 10-pela skul long Pot Mosbi i bin pilai wantaim long ol wan wan fan-fil ektiviti. Ol bin i gat sans long lukim ol Digicel Kap pilaia husat i save stap long Pot Mosbi na ol mausman bilong SP PNG Hunters.

Stop N Shop Pot Mosbi Vipers, PRK Galp Isapea na TNA

Lion i bin kam wantaim tri-tri mausman bilong ol na i soim sapot bilong ol long dispela program.

Ol pilaia bilong SP PNG Hunters olsem Nickson Borana, Ase Boas, Esau Siune, Benjamin Hetra, Atte Wabo Bina, Thompson Teteh, Butler Morris, Noel Zeming na Adex Wera i bin sanap long helpim ol na skulim ol wantaim ol gutpela skul toktok long ol gret seven sumatin i gat krismas namel long 13 na 14.

DEO bilong Digicel PNG, Maurice McCarthy, i tok em i amamas na welkam long ol pilaia bilong PNG Hunters. Ol i joinim dispela program we bai strongim gutpela tingting na komyuniti namel long ol yangpela lain long Pot Mosbi.

“Dispela em i bikipela samting long givim bek long ol lokal komyuniti wantaim helpim bilong ol lokal Digicel Kap pilaia na SP PNG Hunters pilaia bilong yumi, husat i bin sanap na givim taim bilong ol long skulim ol yangpela sumatin,” McCarthy i tok.

“Dispela program em sans bilong ol skul long Pot Mosbi long kam bung wantaim. Ol sumatin i kamapim poroman wantaim ol sumatin bilong narapela skul na luksave long ol nupela samting we ol i no inap i gat dispela sans long lainim ol nupela samting, sapos ol i no bung olsem.”

I gat 5-pela sesen bilong spot program i kamap long asde olsem wom ap na sumba, helt na welbing, ol besik bilong ragbi lig, tok bilong kirapim tingting bilong ol sumatin, ol tim bilding ektiviti na tas futbol.

McCarthy i tok ol dispela sesen i soim ol sumatin long ol gutpela sait bilong stap strong aninit long spot.

“Olsem pat bilong stap helti na long gutpela laipstail, em i namba wan samting long ol boi na gel wantaim i ken strongim tingting bilong ol na sapot long ol dispela ektiviti,” CEO i tok.

“Dispela sesen em ol i bin kamapim long strongim ol yangpela manmeri i ken makim gut long pilai spot, stap strong long helt na strongim edukesen bilong ol long bihain taim.

Digicel Kap Skul Program bai go het insait long taim bilong skul holide long olgeta hap long kantri.

Program bai go aut long Lae na Kokopo long Julai 13. Long tem 3 skul holide, dispela Skul Program bai go olsem long Goroka, Mt. Hagen, Jiwaka, Wabag na Mendi.

Moa long 1000 praimer i skul sumatin bai kisim gutpela tingting long dispela program long dispela yia. I gat 44 skul i stap insait long dispela program na 20 sumatin i makim wan wan skul bilong ol.

Olgeta 11 Digicel Kap tim i resis long Digicel Kap bai stap wantaim long dispela program taim ol i go aut long wan wan rijon bilong ol.



Ol sumatin i pilai tas futbol long taim ol i statim Digicel Kap Skul Holide Program long Nesenel Futbol Stediam asde.

**PNG POWER Ltd**

PABLIK TOKSAVE

NOKEN KUKIM PAWA POLE

PNG PAWA ILAIK TOKSAVE LONG GEN-EROL PABLIK ISTAP LONG MAGI HIGH-WAY LONG CENTRAL PROVINS LONG INOKEN MEKIM PAIA ARERE LONG PAWA POLE O KUKIM OL PAWA POLE LONG ROT. DISPELA PASIN ISTOPIM PAWA IGO LONG OL KASTOMA LONG HIGHWAY.

LAS MUN, PAIA IBIN KUKIM DAUN MOA LONG 20 PAWA POLE NA KAMAPIM BIRUA LONG PAWA INO GO KAMAP LONG OL KASTOMA LONG HIGHWAY.

PNG PAWA ISINGAUT LONG GENEROL PABLIK LONG MAGI HIGHWAY LONG INOKEN MEKIM PAIA ANINIT O KLOSTU LONG OL PAWA POLE.

PNG PAWA IASKIM TU GENEROL PABLIK LONG MAGI HIGHWAY LONG HALIVIM LONG STOPIM PAIA ARERE LONG OL PAWA POLE SAPOS IKAMAP.

LONG KISIM MOA KLIA TOKTOK O RIPOTIM PAIA LONG OL PAWA POLE, PLIS RINGIM 24 HOUR CALL SENTA BILONG PNG PAWA LONG MOBILE NAMBA: 70908000 / 7653 5261 / 7653 5272.



Authorised by Management of PNG Power Limited.

Ol Miok i rausim Guria long raun 12

ENGA Miok i soim narapela kain kala long rausim ol Agmark Rabaul Guria, 12-18, long kapitel bilong Enga, Wabag, long raun 12 bilong Digicel kap.

Dispela win i putim ol Enga i go antap long namba tri ples long lata bi-long Digicel Kap wantaim 17 poin na premia tim i go bek long namba 4 ples long lata wantaim 16 poin.

Mt. Hagen Eagles i stap yet long namba tu ples wantaim 19 poin, bi-hain long ol i daunim ol Waghi Tumbe,

16-4, long asples bilong ol boi Waghi, Minz.

Lae Snax Tigers i stap long namba wan ples yet long lata wantaim 21 poin bihain long ol i bin kisim tupela poin nating bikos ol i stap sambai long raun namba 12 resis.

Tumbe i go bek long namba 5 ples long lata wantaim 13 poin na Hela Wigmen i skruim poin bilong em wan-taim wanpela poin na nau em i stap long baksait bilong ol Tumbe wantaim 12 poin.



Ol pilaia bilong Enga Mioks i ran i kam long kisim bal taim pilaia bilong ol Gurias i takolim Mioks pilaia.



- 1 **ISI YA:** Senta bilong Kone Storms i kisim strong-pela takol i kam long pilaia bilong South's long pilai namel long ol long Pot Mosbi ragbi lig resis.
- 2 **MI TRAIM:** Gol Suta bilong Rebels 2 i makim ring long skoa taim ol pilaia bilong Veupunama1 i putim was long Divisen 1 pilai bilong ol long Bisini.
- 3 **YU KAM:** Tupela pilaia bilong Vipers i stopim pilaia bilong Isapea taim ol i bung long Digicel Kap pilai long Kone long Mosbi.
- 4 **EM YA:** Huka bilong Vipers i redi long pasim bal i go long wan pilaia bilong em taim pilaia bilong Isapea i kam long takolim em. Isapea i win 12-6.
- 5 **BRUKIM BANIS:** Kepten bilong Vipers, Samuel Koim, i brukim banis bilong Isapea.

Ol poto: Nicky Bernard



DIANA
Tuna

*Niupela Swit Teist
Nau Igat Moa Oil!*



PNG's ORIGINAL TUNA

PNG MADE  Manufactured by:
RD TUNA CANNERS LTD.

Kone Storms daunim Souths



TRAI TAIM: Senta bilong Kone Storms i flai long trail lain na mekim hat long pilaia bilong Souths long takelim em. Storms i win 26-18. *Poto Nicky Bernard*

Nicky Bernard i raitim

POT Mosbi Ragbi Lig i go insait long raun 2 bilong ol long split raun na planti tim i wok long pilai strong long stap antap long lata.

Kone Storm i mekim wanpela bikpela win long las wiken long kisim ol go antap long lata taim ol daunim pawa bilong Souths.

Bikpela fowod bilong Storms i mekim bikpela wok long brukim ol banis bilong ol Souths na mekim isi long ol bek lain bilong ol long go putim trai.

Kone Storms i gat planti ol yangpela pilaia we ol i save gut long pilai bilong ol na dispela i mekim ol Souths i painim hat long stopim ol.

Souths i gat ol gutpela bikpela fowod long brukim banis bilong ol Storm tasol ol yangpela Storm i holim ol gut tru long olgeta hap kona bilong pilai graun.

Storm i kamap wantaim 5 trai long winim ol Souths wantaim 3 trai,

Storm nau i muv go antap liklik long lata bilong PRL. Long Ful taim skoa bilong tupela tim, Kone Storm 26 na Souths 18.

Long ol narapela A gret pilai Butterflies 14 daunim Ho-

hola 10, Paga 16 winim Magani 12, Brothers 18 daunim Dobo16, Royals 12 winim Defence 10 na West 16 daunim Hawks 12.

Long dispela wiken Sarere pilai bilong ol A gret bai lukim, Butterflies bai brukim bun wantaim Dobo Warriors na Kone Tigerr bai traim strong bilong ol Souths. Dispela tupela pilai bai kamap long Nesenel Futbal Stadium.

Long Sande bai Brothers i traim bun bilong ol Defence na Royals bai traim pawa bilong Tarangau. Dispela pilai tu bai kamap long Nesenel Futbal Stadium graun 2.

Long Sir Hubert Murray Stadium bai tupela A gret pilai kamap bipo long Digicel Kap resis. Dispela tupela A gret tim em Kone Storms bai kisim ol wantok bilong ol West long namba wan gem na Paga Panthers bai kisim Hawks.

Kone Storms na Hawks bai kisim planti sapota long wanem, Sir Hubert Murry Stadium i stap long hom graun bilong ol.

Long poin lata, 5-pela tim go pas em long Hawks wantaim 19-poin, Kone Storms wantaim 19-poin, Royals wantaim 18, Paga Panthers wantaim 18, Hohola Flies wantaim 15 na Tarangau 15.



*** Treated Mosquito Nets PREVENT Malaria**

*** Visitect TESTS for Malaria**

*** Arterakine Tablets TREAT Malaria**

Good Products, Better Prices, ikam long

 **Johnstons Pharmacies Ltd**

P.O.Box 1066, Boroko, Papua New Guinea.

Email sales@johnstons.com.pg